

JESU KHRISTU LoNGUYE

ITOLO, NAMUHLA, NA PHAKADZE

 Akubusise. Ngiyabonga, mnumzane. Kuhle kakhulu kuba lapha kusihlwa. Bengilindzele lesikhatsi lesi ngekulangatelela lokukhulu. Sita edolobheni lenu lelihle cishe etinyangeni letisitfupha letendlulile, khona nje emvakwa Khisimus, futsi besihamba lapha nani. Futsi ngalelinye lilanga ngisengaphandle neMnaketfu Tony Stromei, nga... Sawela embonweni kutsi kwakuyoba kuhle kutsi satane kanconwana ngaphambi kwekutsi kudzingeke sihambe. Futsi besicabanga kutsi kungabaku kuhle kuba nemkhankhaso lomncane entasi lapha, kutfoli i... sonkhe sibutsane ndzawonye futsi sibe nenhlanguyelo letsite eVini laNkulunkulu. Futsi ngi...

² Labanengi balabazalwane laba lengihlangane nabo, futsi ngivakashela lamanye emabandla abo futsi ngatfola kwemukelwa lokumangalisako. Futsi ngicabanga kutsi kuyintfo lenhle kutsi sonkhe singahlangana ndzawonye kulobusuku lobumbalwa manje, kuhlanganyela eVini laNkulunkulu. Siyetsema kutsi kutoba yimphumelelo lenkhulu enkhatimulweni yaNkulunkulu, nekwandziswa kwesizatfu Jesu lasifela, loko kutsi, kute Abe nelibandla lelingenabala noma sici uma Abuya. Manje, asikameleli noma nguyiphi inhlango letsite. Sita nje njengenhlanganisela yemahlelo, kubutsana ndzawonye nawo wonkhe umKhristu, kute sibe nalenhlanguyelo ndzawonye.

³ Futsi sitokhulekela bantfu labagulako. Futsi tikhatsi letinengi, uma utsintsa kukhulekela labagulako, bese-ke batsi, "ungumphilisi webuNkulunkulu." Cha. A—angikholwa kutsi ukhona ngaphandle kwaMunye kuphela, naloyo nguKhristu. Si... Ngaletinye tikhatsi bakuchaneka loko kuwe, njengemphilisi webuNkulunkulu, kodywa ngoba ukhulekela labagulako. Kodvwa angikholwa kutsi kukhulekela labagulako kungakwenta ubi kakhulu ngumphilisi webuNkulunkulu kunekutsi bekungakwenta uMsindzisi webuNkulunkulu kukhulekela labalahlekile. Ngako siyati kutsi besingeke sibe nguMsindzisi webuNkulunkulu noma umphilisi webuNkulunkulu.

⁴ Sikholwa kutsi tonkhe letinzozo leti letinkhulu lesitjabulelako namuhla kulomnotfo wemaKhristu lesinawo, konkhe kwatsengwa eKhalvari yiNdvodzana yaNkulunkulu, Jesu Khristu. Sikholwa kutsi "Yalinyatwa ngenga yetiphambeko tetfu. Yahubulwa ngebubi betfu. Sijeziso sekuthula kwetfu

sasisetikwaYo, nangemivimba yaYo siphilisiwe tsine.” Konkhe kusikhatsi lesendlulile. Kuyintfo letsite Nkulunkulu lasentele yona eKhalvari. Futsi, njengemaKhristu, sinelilungelo lekujabulela letibusiso leti Lasitsengele tona.

⁵ Ngako, ngako-ke, akekho umuntfu lobekangasindzisa lomunye. Kube bekunjalo, Jesu bekangeke adzingeke kutsi afe. Kodvwa ngesikhatsi Jesu afa eKhalvari, Wacedza umbuto wesono ingunaphakadze. Futsi wonkhe umuntfu, konkhe lokudaliwe emhlabeni, ngesikhatsi Afa, kwasindziswa ngawo lowomzuzu. Yonkhe...Linani labhadalwa, ngalokuphelele. Kwahlangabetwana nako kakhulu ngangekutsi Nkulunkulu wakhomba kutsi kwakuliciniso.

⁶ Manje, intfo kuphela lesifanele siyente, kwemukela loku, kukwemukela, kukukholwa nekukwemukela. Kodvwa nanoma Wayifela kangakanani insindziso yetfu, si—sifanele, cobolwetfu, siyemukele njengelwati lolucondzene natsi lucobo, sifiso setfu—setfu lucobo. Sifanele sifune kusindziswa, futsi sikholve kutsi etikwetisekelo teNgati yaKhe lecitsiwe kutsi sisindzisiwe emvakwekuba sesihlangabetene netidzingakalo teliBhayibheli.

⁷ Ngiyakholelwa eBhayibhelini kusambulo lesigcwеле saJesu Khristu. Manje, ngiyakholwa kutsi Nkulunkulu angenta tintfo lettingakabhalwa eBhayibhelini, ngoba UNGU Nkulunkulu. Kodvwa kuphela nje uma singakutfola eBhayibhelini, njengesetsembiso, khona-ke siyati kutsi kuliciniso, ngoba le—leLivi licinisile, sonkhe sikhatsi. Futsi ngako siyaMkholwa kugcina setsembiso saKhe.

⁸ Ngikholwa kutsi Ungusomandla. Ngikholwa kutsi Ungulongenasisiphetfo. Ngekuba ngulongenasisiphetfo, Bekati tintfo tonkhe. Wati tintfo tonkhe. Iminyaka lesigidzi ngaphambili kwekutsi kubekhona umhlaba, Bekati kutsi siyohlala khona lapha kusihlwa. Uma kungenjalo, Akasuye longenasiphetfo. Futsi uma A—futsi uma Angesuye longenasiphetfo, khona-ke Akasuye Nkulunkulu.

⁹ Ngako sikholve kutsi Livi, leliBhayibheli, liLivi laNkulunkulu, futsi, ngako-ke, kutsi—kutsi ungawulengisa umphemfumulo wakho kunoma ngusiphi sigaba saLo. Nguleyondlela kuphela longaba nekukholwa ngayo, kukholwa kutsi une...Kukholwa kutofanele kube nendzawo yekusimisa ndzawanatsite, futsi lifanele kubambelele endzaweni. Futsi akukho lokwakungacina kakhulu kuneLivi laNkulunkulu, ngoba Livi linguNkulunkulu. Nguloko liBhayibheli lelikufundzisako. Ngako-ke, uma Nkulunkulu asho noma yini ekhatsi Lapha, likholwa linga Yigcizelela nga “amen,” noma yini Layishoko.

¹⁰ Manje, ngoba Yena angu longenasiphetfo, lonemandla onkhe, losetindzaweni tonkhe, Angeke abe munye ngaphandle

kwalomunye. Futsi kuba nguNkulunkulu, Utofanele abe ngiko konkhe kwako.

¹¹ Manje, ngako-ke, njengoba singu labanesipheto njengoba sinjalo, kulomnyaka singasebenta entfweni letsite futsi sicabanga kutsi sinayo iphelele. Emnyakeni lotako, noma mhlawumbe kusasa, sifanele sigucule umcondvo wetfu. Kwehlukile. Sitfole intfo lencono, ngoba, tsine, singu labanesipheto.

¹² Kodvwa Ungu longenasipheto. Ngako uma Asho Livi, lingunaphakadze ngaleyondlela. Angeke lentiwa labancono. Angeke labuyiselwa emuva. Uma Nkulunkulu abitelwa enkhundleni, kunoma nguluphi ludzaba, nendlela Nkulunkulu lenta ngayo kuleyondzawo, kwekucala, Ufanele ente ngendalela lefanako ingunaphakadze uma Abitelwa enkhundleni futsi.

¹³ Ngoba, uma Bekangenta lokwehlukile kunaloko Lakwenta esikhatsini sekucala, khona-ke kukhona lokungalungi. Niyabona na? U...Kwakungeke kuphelele. Niyabona na? Ngako-ke Wenta kabi ngesikhatsi Enta kwekucala, uma Enta kwesibili lokwehlukile kunaloko Lakwenta ekucaleni.

¹⁴ Ngako-ke, ngesikhatsi Nkulunkulu enta likhambi lemuntfu kutsi asindziswe, ensimini yase-Edeni. U...Batama kutfutfukisa likhambi laKhe, iminyaka letinkhulungwane letisitfupha, futsi bangeke balitsintse. Wenta, etikwetisekelo teNgati lecitsekile yalobulewe longenacala, futsi Akakaze akugucule. Sitamile kufundzisa bantfu kuKhristu. Sitamile kubahlela kuKhristu. Sitame tonkhe tinhlobo tetinchubo, kodvwa tonkhe tehlulekile. Yinye kuphela indzawo umuntfu langahlangana kuyo emhlabatsini lojwayelekile, nekukhonta, naloko kungaphansi kweNgati lecitsekile yaJesu Khristu. Bekungaleyondlela kusukela ekucaleni, ngoba Angeke akugucule. Kuhlala njalo kuiNgati, iNgati.

¹⁵ Futsi namuhla uma sicabanga kutsi sehlukile kulomunye umfo, nakanjalonjalo, akusebenti nje. Sifanele sichubeke semukele letotisekelo teNgati lecitsekile. Futsi ngako-ke, ngesikhatsi Nkulunkulu abitelwa enkhundleni, kophilisa umuntfu, Waphilisa umuntfu etikwetisekelo tekukholwa kwakhe. Futsi uma Abitelwa enkhundleni futsi, Uyophilisa umuntfu lolandzelako ngendalela lefanako, noma nakungenjalo Wenta kabi. Uma Nkulunkulu ake waphilisa umuntfu ngoba wakholwa, bese-ke kutsi indvodza lelandzelako ibita ngeluhlobo lolufanako lwekukholwa, Nkulunkulu ubophelelekile kwenta intfo lefanako kumuntfu lolandzelako. Uma kungenjalo, Ukhetsa bantfu, futsi wenta kabi ekucaleni. Ngako, niyabona, emuva eVini. Ngi—ngiyakukholwa ngenhlitiyo yami yonkhe.

¹⁶ Manje silindzele Nkulunkulu kutsi asentele tintfo letinkhulu. Futsi sifuna, uma sesihamba, kubona sibusiso shishiywa kulelidolobha. Futsi ngyiati nitoba sibusiso kimi,

ngoba lapho lababili noma labatsatfu babutsene khona eGameni laKhe, Wetsembisa kuba lapho. Manje, uma loko kungenjalo, khona-ke sonkhe silahlekile neliBhayibheli lineliphutsa. Loko kwenta Jesu Khristu lapha manje. Uma loko kungenjalo, khona-ke sishumayela ini, yini lesiyikhholwako na? Niyabona na? Ulapha. "Lapho lababili noma labatsatfu babutsene ngeliGama laMi, Ngisemkhatsini wabo." Manje, sifanele sente ke, futsi sikhholwe, futsi—futsi sikhholwe kutsi Ulapha, futsi sente sengatsi Ulapha. Futsi khumbulani, Uyasigadza emvakwekuba sesisuka lapha, futsi.

¹⁷ Futsi siyetsema kutsi wonkhe umuntfu longakasindziswa utosindziswa kulomkhankhaso. Siyetsema kutsi singeke sibekhona sihlalo lesingenalutfo, kuwo onkhe lamabandla lapha lamelelwé, kusukela kulesikhatsi lesi kuchubeke. Futsi ngiyetsema kutsi kutobakhona ifashini lendzala, imvuselelo letfunyelwe nguNkulunkulu lecubukako, eTucson lapha, lototfumela nje tinkhulungwane temiphefumulo eMbusweni waNkulunkulu. Ngikholwa kutsi leyo yintsandvo yaNkulunkulu. Leso sifiso saKhe kusihlwa.

¹⁸ Futsi akekho umuntfu longakwenta ngesingaye. Kubita tsine sonkhe, ndzawonye, sidvonse ndzawonye, sikhuleke ndzawonye, sime ndzawonye ebunyeni, eMoyeni. Futsi khulekelani loku. Bazalwane bekasolo angitjela kutsi emabandla abenemihlangano yemikhuleko, ngaphambi kwalomhlangano. Futsi ngibonga kakhulu ngaloko. Kuto...Uma nibutsana ndzawonye kutsi nikhuleke kanjalo, kuntjintja sonkhe simo sendzawo, uma sikhuleka.

¹⁹ Manje, asinawutama kunihlalisa sikhatsi lesidze, kusihlwa ngabunye, ngoba ngiyati nifanele niphume futsi niye emsebentini wenu. Ngako sitowetama, busuku ngabunye, kunikhulula niphume kusenesikhatsi, kute nikhone kubuya ngebusuku lobulandzelako. Futsi loku kuvakashalokuncane nje, njengoba sibutsene ndzawonye. Futsi nje sinalobusuku lobune, ngiyakholwa. Kukutsi, ngiyacabanga, kunjalo, ngaLesitsatfu, ngaLesine, Lesihlanu. Ya. Kulungile, busuku lobune. Beseké sigcina lapha kulelihhola lelifanako ekudleni kwasekuseni kweMadvodza labosomaBhizinisi, ngeMgcibelo ekuseni, lokukutsi, sive siyamenywa.

²⁰ Manje, angisiso sihambi. Angitiva njengesihambi emkhatsini wenu. Ngi—ngingumnaken. Futsi ngako ngiyetsema kutsi nitiva ngendlela lefanako ngami. Futsi manje, ngaphambi kwekutsi sisondzele eVini, asisondzele kuMcalsi weLivi sisakhotsamisa tinhloko tetfu umzuzwana nje sentele umkhuleko.

²¹ Nkulunkulu Somandla, Yise weNkhosi yetfu Jesu Khristu, LowaMvusa kulabafile futsi waMgcina aphila yonkhe leminyaka...Futsi Uyaphila kute kube phakadze

ubusa etinhlitiywani tetfu kusihlwa, uyasilawula, kusihola nekusicondzisa. Kwangatsi sonkhe singatinikela entsandvweni yaKhe yebuNkulunkulu, kute Asihole ngendlela Latsandza kutsy sihambe ngayo.

²² Sifuna kuKubonga, Babe, ngalelitfuba lelihle kakhulu kwetfula Jesu Khristu ngendlela yeMphilisi lomkhulu lonemandla, uMsindzisi lomkhulu wemunfu, uMenelisi kuyo yonkhe inhlitiyo relangatelelako, Imphilo kulabagulako, iNsindziso kulabalahlekile, iNkhosi letako kulabangcwele. O Nkulunkulu, siphefumulele sonkhe, kusihlwa.

²³ NgiyaKubonga ngalamadvodza, labelusi laba bemihlambi yalelidolobha, labazalwane laba lababafundisi laba netindzawo tabo letincane kulolonkhe lidolobha, lapho bativela khona njalonjalo ngaMoya waNkulunkulu kutsi ungene e—emagagasini a—aMoya loyiNgcwele, angene emkhatsini wabo futsi abatjеле kutsi bafanele benteni, kutsi bafanele bayihole kanjani imvu. Futsi kusihlwa, kubonakala kwangatsi, Nkhosi, njengoba uMlayeto ushanyele wehla udzabula kulawomagagasi, kutsi wonkhe wavumelana kutsi sifanele sihlangane ndzawonye kulenkonzo. Manje wota, Nkhosi Jesu.

²⁴ SiyaKubonga ngeRamada Inn nangetandla tayo letivulekile kwemukela liVangeli, kusivumela site lapha kutokhonta kulesakhiwo lesinesishayisa-moya. Babe Nkulunkulu, sikhulekela kutsi aku nawubakhona muntfu lolahlekile lophuma kulesakhiwo ngaphandle kwekusindziswa. Siphe kona, Nkhosi. Kwangatsi i... Uma tisebenti talesakhiwo, kuleRamada lenkhulu, tingaka sindziswa, siyakhuleka, Nkulunkulu, kutsi Utobasindzisa.

²⁵ Philisa kugula khona lapha. Kwangatsi kungafezekwa kutsi bantfu batohamba kulelihhola futsi bakhale tinyembeti, ngaphansi kwemandla aMoya loyiNgcwele. Siphe kona, Nkhosi. Silangatelela letintfo leti. Futsi sikhulwa kutsi kuyintsandvo yaKho yebuNkulunkulu kwembula kitsi manje, nekusikhombisa Bukhona baKho, kutsi Ulapha futsi uyaphila, futsi unatsi kuze kube phakadze.

²⁶ Sibusise njengoba siveta umtamo wetfu lobutsakatsaka. Kwangatsi Moya loyiNgcwele angangena. Futsi kwangatsi singete sacabanga imicabango yetfu lucobo, kodvwa kwangatsi singaba nemicondvo yetfu levulekile ekubekweni kweBukhona baKhe lobukhulu, kute sati umcondvo waKhe, kugewalisa loko lokwakubhalwe emBhalweni, “Akutsi lowomcondvo lowawukuKhristu ube kini.”

²⁷ Sibusise, Babe wetfu. Futsi uma sisuka enkonzwensi kusihlwa, kwangatsi singasho njengoba siya emakhaya etfu, “Tinhlitiyo tetfu betingavutsi yini ngekhatsi kwetfu lapho Asakhulumu natsi endleleni na?” njengoba kwenteka ngalelinye lilanga kadzeni, ngafakazi wekucala wekuvuka ekufeni,

njengoba Kleyophase nemngani wakhe bekabuya edolobheni. Sikucela eGameni laJesu. Amen.

²⁸ Bantfu labanengi batsi kutsatsa imiBhalo umvangeli lato—latofundza kuso. Futsi ngifisa, kusihlwa, kutsatsa nje emavesi lambalwa emBhalo futsi ngitame kuwachaza, ngendlela yami letfobekile, kute nibone Jesu Khristu. Ngifuna nivule kanye nami manje encwadzini yaJohane loNgewe, sahluko se 12 nelivesi lema 20, uma ningatsanza kungilandzela njengoba sifundza. Johane loNgewe 20 noma . . . Johane loNgewe 12:20 nelema 21.

Futsi kwakunemaGrikhi latsite emkhatsini walabakhuphukela kutokhonta emkhosini:

Yena loyo-ke weta kuFiliphu, lobekawaseBethsayida yaseGalile, futsi wacela kuye, watsi, Banumzane, sitsandza kubona Jesu.

²⁹ Bese-ke encwadzini yemaHebheru, sahluko se 13 nelivesi le 8.

Jesu Khristu longuye itolo, . . . namuhla, naphakadze.

³⁰ Ngifisa kwenta loku njengesihloko: *Jesu Khristu LoNguye Itolo, Namuhla, NaPhakadze.*

³¹ Bengitsamela libandla ngeliSontfo ebusuku, lapha edolobheni, lelinye lemabandla enu lamahle. Futsi lapha ngitamile kuvakashela labanengi ngangoba ngingakhona, kusukela sibe sedolobheni, futsi ngatfola inhlanganyelo lenkhulu futsi nekwemukelwa e-Assemblies of God, emaBaptisti, ne-Anderson Church of God, nalabanye labanengi lengibavakashelako. Futsi kulelibandla, ngemuva kwe—kwelipulpiti, kwaku nemBhalo, njenge liBhayibheli, lelibhaliwe, “Jesu Khristu longuye itolo, namuhla, naphakadze.” Loko kutsi akube yingcikitsi lekanye nami emikhankhasweni, kutsi ngitosebentisa loko, ngoba ngikholwa kutsi yonkhe iNcwadzi isambulo saJesu Khristu, futsi Yena unguye itolo, namuhla, naphakadze. Bese-ke kuba . . .

³² Ngitsandza kwakha ingcikitsi yami, “Banumzane, sitsandza kubona Jesu.” Futsi ngi—ngiyakholwa, kusihlwa, kutsi wonkhe wesilisa newesifazane ekhatsi lapha bekayotivela ngesihle kutsi lamaGrikhi avakalisa imizwa yetfu sonkhe. Ngoba, bebabile ngaJesu, futsi manje bebafuna kuMbona. Ngi—ngikholwa kutsi—kutsi akukho muntfu longeva indzaba lemangalisako yaJesu Khristu kodywa loko lakulangatelela enhlitiywensi yakhe kutfola kuMbona. Loko yi—yi . . . Leso sifiso se—selikhholwa, kuMbona. Futsi angikhatsali noma Mfishane, mudze, noma Uyini. NgiyaMtsandza. Ngifuna kuMbona. Futsi Loyo Lowangisindzisa futsi wangentela loko Lakwentile, ngi—ngiyalangatelela kuMbona.

³³ Manje, akukho kungabata kutsi lamaGrikhi abe ngulabagucukele enkholweni yemaJuda, ngoba siyabona kutsi kwaku ngumkhosi weliPhasika, lapho liwundlu leliphasika labulawa khona, nalamaGrikhi asemkhatsini wabo. Manje, emaGrikhi bekawebantu labanemathalenta lamakhulu kakhulu. Bebahola umhlaba ngebuciko. Futsi bafundze kakhulu kusayensi. Futsi bebabantu labakhulu. Futsi bebatifundziswa letinkhulu; bebafundza tincwadzi letinengi. Futsi—futsi intfo letsite, bafanele kutsi bebabambe i—intfo letsite; kutsi enhlitiywensi yemuntfu, silangatelele kutfola intfo letsite lecedza loko koma lokukhulu lokuvela enhlitiywensi yemuntfu.

³⁴ Nike nacabanga kutsi kungani umuntfu angenta liphutsa na? Kungoba utama kwenelisa koma Nkulunkulu lakufake enhlitiywensi yakhe, komela Yena. Bese—ke utama kukwenelisa ngetintfo telive. Lingeke leneliseke lite lipheleliswe nguNkulunkulu cobo lwaKhe, aze Angene futsi enelise loko kulangatelela lokukhulu nekoma enhlitiywensi yemuntfu. Kunengi kakhulu nje kwemuntfu lokungeke kugcwale. Akukho lokunye lokungatsatsa indzawo yako aze Nkulunkulu atsatse sikhundla saKhe lesifanele enhlitiywensi yemuntfu.

³⁵ Nalama Grikhi bekevile, futsi akungabateki bekakadze afundza liThestamenti leLidzala, futsi bebevile ngaMesiya lotako nekutsi Ufanele abe njani ngesikhatsi Efika. Futsi bebalangatelele kubona kutsi Nkulunkulu uyoba njani lapho Ayobonakaliswa enyameni, kutsi uyobukeka ayiNdvodza lenjani leyogcwaliswa nswi kute kutsi kugwala kwebuNkulunkulu kube kuYe. “Bekangaba yini Yena?” Futsi bebeva ngaJesu, lobekatisho kutsi unguloMuntfu lona, Mesiya.

³⁶ Kutsi, emaJuda tinkhulungwane teminyaka bekakadze abheke Lona lotako, lapho Nkulunkulu cobo lwaKhe ayokwentiwa khona umuntfu esimeni seNdvodzana yaKhe, kute ophe futsi afe. Ngoba kwakungekho muntfu lobekangafela lomunye, ngoba sonkhe sasinelicala, ndzawonye. Umuntfu munye bekangeke asindzise lomunye.

³⁷ Futsi kwakufanele kubekhona uMuntfu Lobekafanelekile. Emitsetfweni lemidzala, bafundisi labayatiko, njengemhengi losihlobo semndeni. Kwakune...Yena, Nkulunkulu, wadzingeka abe siHlolo sengati kitsi. Futsi Wawela lithende laKhe—laKhe. Futsi wehla, ekubeni nguNkulunkulu, Jehova lomkhulu; futsi wentiwa inyama, ngesimo seNdvodzana yaKhe, kute Nkulunkulu abonakaliswe. Futsi ufanelekile, nesiHlolo sengati kitsi, kute Afe kutsi asuse tono tetfu, kusindzisa lokudaliwe kwaKhe luCobo.

³⁸ O, lendzaba yinkhulu kakhulu! Ayikho indlela yekusondzela kuyo, kwati yona mbamba, kutsi bewungayivakalisa kanjani. Akukho...Akukho elulwimini lwemuntfu, lolungavakalisa

kutsi lutsandvo luyini, kutsi Nkulunkulu bekatokwehla, uMdali, kusindzisa kwaKhe luCobo lokudaliwe.

³⁹ Manje, sitfola lamaGrikhi omile. Bekevile. “Kukholwa kuta ngekuva, nekuva kweLivi.” LiBhayibheli lasho njalo. EmaHebheru atsi, “Kukholwa kuta ngekuva, nekuva Livi laNkulunkulu.” Manje, bebevile kutsi kwakutobakhona Mesiya, ngako-ke beta kutobona. Bona, beta kutobona loMuntfu lobekatoba nguloyo Mesiya; Lowakholwa, emkhatsini webantfu, beka nguloyo Mesiya.

⁴⁰ Manje, leyo yindzawo lefanako lesihleti kuyo kusihlwa. Sivile ngaNkulunkulu. Sifundziswe ngaNkulunkulu. Kuyoyonkhe leminyaka, sibe nemabandla, emabandla lamakhulu, emadvodza lamakhulu, bavangeli labakhulu. Kodvwa ngikholwa kutsi siphila esitfuntini sekubuya kweNkhosi Jesu. Kantsi, leliBandla liphume ekulungisisweni ngaphansi kwaLuther, kungcweliswa ngaphansi kwaWesley, embhabhatisweni waMoya loyiNgcwele, futsi beta eBandleni leliphelele lelingenabala noma sici. Kutsi, ngalelo Bandla, kute Nkulunkulu ahlene abuyisele bonkhe labangcwele labagezwe ngeNgati, futsi abayise eKhaya, kusukela phansi emnyakeni. Futsi siyi... Siya ngekufanana kakhulu naKhristu, nalabanengi engcosaneni ngesibalo, ngaso sonkhe sikhatsi.

⁴¹ Manje, sitfola kutsi lamadvodza lawa alambile, beta kutobona kutsi loMuntfu bekabukeka kanjani. Futsi babuta umbuto, “Banumzane, sitsandza kubona Jesu.” Manje, bebaile ngaYe, beva labanye bakhuluma ngaYe, bafundza ngaYe eBhayibhelini, kodvwa bebafuna kuMbona.

⁴² Manje esihlokweni sami, liBhayibheli latsi, “Unguye itolo, namuhla, naphakadze.” Khona-ke, uma lamadvodza bekafisa kuMbona, naNkulunkulu wenta indlela kutsi kulindzela kwavo bekungeneliseka; Wenta indlela lebeba ngaMbona ngayo, ngalenyenye yetinceku taKhe. Manje, uma—uma Anguye itolo, namuhla, naphakadze, futsi sinesifiso lesifanako lesicotfo kuMbona, Yena akabopheleleki yini kuTikhombisa emkhatsini wetfu? Manje, leso sitatimende lesikhulukati. Kodvwa uma liBhayibheli lingasilo liciniso, khona-ke sikuphi na? Niyabona na? Kodvwa liBhayibheli latsi Uyafana. Futsi uma A... Angeke nje afane *ngandlela* tsite. Utوفanele afane ngayo yonkhe indlela Lake aba ngiyo. Utsi, “Unguye itolo, namuhla, naphakadze.”

⁴³ Nala maGrikhi bekafuna kuMbona, ngoba kukholwa kwakufikile ngekuva. Futsi efika futsi bekenelisekile. Wahamba, ati kutsi loyo kwaku nguMesiya.

Manje, uma sifisa kusihlwa kubona Lona Lo...

⁴⁴ Siya esontfweni, noma sitiva sitsandza noma cha; nalapho tsine, libandla letfu, sikhokha kweshumi kwetfu. Ngabe ku—ngabe kuyinganekwane na? Ngabe nje ku—kusakhiwo lesibhadala kuso na? Ngabe lendvodza lena, lengumelusi

wetfu, ingumlingisi nje wentfo letsite akukho lutfo kuyo na? Ngabe inkholo yebuKhristu ifana nesayensi yetinganekwane yesiGrikhi noma isayensi yetinganekwane yemaRoma, noma lokutsite, kuyinganekwane nje? Noma, ngabe kungiko sibili?

⁴⁵ Manje, kimi, leliBhayibheli lisekhatsi kwekutsi licinisile noma nakungenjalo Lineliphutsa. Lonkhe Livi licinisile noma akukho nakunye kwaLo lokuliciniso. Niyabona na? Futsi manje, uma Enta lesersetsembiso lesi, khona-ke akusuwe nami lesi bophelelekile kulesetsembiso lesi. Akusuwe nami lesi bophelelekile kufakazela lesersetsembiso lesi. NguYe longaphansi kwesibopho, ngoba BekanguYe Lowakusho. Kunjalo. Sicaphuna kuphela loko Lakusho, kutsi, “Unguye itolo, namuhla, naphakadze.” Futsi naku...

⁴⁶ Bangakhi lapha labangatsandza kuMbona na? Nje—nje kusho njalo, phakamisa sandla sakho. Utsi, “Ngi—ngiyatsandza...” Manje, kwakunalamabili lapho, babili kuphela lebekafuna kuMbona, futsi nankha emakhulu lamabili noma emakhulu lamatsatfu afuna kuMbona. Yebo-ke, ke, kungani singaMboni uma Anguye itolo, namuhla, naphakadze na? Manje, nguleyondlela lesifuna kukubuka ngayo. Kusemhatsini wekutsi kuliCiniso noma akusilo liCiniso. Futsi kungako ngakuvakalisa kwekucala. LeliBhayibheli kusemhatsi kwekutsi liliCiniso noma alisilo liCiniso. Ngako-ke, uma liBhayibheli lisho noma yini, ungabambelela nje kuko, ngoba Nkulunkulu ubophelelekile kuleLivi, ngoba BekunguYe lowenta lesersetsembiso. Nkulunkulu washo njalo, kulungile, kunjalo.

⁴⁷ Manje, kutonika kuloko lokufunako. Ngalo kwejwayelekile uyakutfolo lolokufunako. Ngifuna nikukhumbule loko. Manje, uma nifuna kubona Nkulunkulu, Nkulunkulu bekangabonakala. Uma nifuna kuva Nkulunkulu, Nkulunkulu angevakala. Njengoba nje Bekenjalo itolo, unjalo naYe namuhla. Akagucuki.

Manje, kungikhumbuta indzaba lencane, noko iliciniso.

⁴⁸ Ngihlala e-Indiana, ekhaya lami lemdzabu. Ngiwase Kentucky, ngekutalwa. Futsi sihlala ngaseMfuleni i-Ohio. Emanti lanele ehlela lapho, ngelusuku, kwenta ilethisi imile yonkhe indzawo e-Arizona. Tigidzi temagaloni emanti tendlula kulelodamu, futsi kubukeka kanjalo ngandlela tsite besingakugega. Sinalokunengi kunaloko lesikudzingako lapho. Sekucishe kube lichaphot. Futsi—futsi udzinga emanti lapha. Kodvwa kuyoba, ngalelinye lilanga, kulesosikhatsi lesikhulu seminyaka leyiNkhulungwane letako, uma sono sisuswa emhlabeni, naletotintfo titawuba kahle.

⁴⁹ Kwakukhona umdwebi lomdzala lobekahlala entasi kulowomfula. Bekalidikhoni ebandleni lami. Ligama lakhe kungu Wiseheart, indvodza lendzala lenhle kakhlulu. Futsi kwakukhona Sontfo sikolwa lotsite edolobheni lakitsi, libandla

lelihle, lelikhulu lelidvumile lihlelo lelatiwako emave ngemave, inhlanguyelo, umelusi lokahle, nebantfu labakahle. Futsi kwakunemndeni lotsite edolobheni lakitsi, lowaya kulelibandla. Futsi kwakunemfanyana kulomndeni lobeka nemdlannda impela ngalelinye lilanga, emvakwekuva leminingi imibhalo lebhalwe endvwangwini nalokunye nalokunye, wate watsi kumake wakhe, watsi, “Make, uma Nkulunkulu anguNkulunkulu lomkhulu, njengoba utsi Unguye, ukhona yini longaMbona na?”

⁵⁰ Watsi, “Ndvodzana, ufanele ubute thishela wakho waSontfo sikolwa. Make akakwati kukutjela loko.”

⁵¹ Ngako waya kuthishela waSontfo sikolwa futsi watsi, “Thisela, ngitsanza kukubuta lokutsite. Ungitjela ngaNkulunkulu loMkhulu,” watsi, “loko kakhulu kakhulu. Uvula Lwandle loluBovu entela bakaIsrayeli. Futsi Wenta lilanga likhanye, futsi Ujikeletisa umhlaba ngalokuphelele ngesikhatsi, emkhondvweni wawo, nakanjalonjalo.” Watsi, “Ukhona yini longaMbona na?”

⁵² Watsi, “Loko kujule kakhulu kimi. Utوفanele ucele umelusi.”

⁵³ Ngako wefika kumelusi wase utsi, “Mfundisi, ukhona yini longabona Nkulunkulu?” Watsi, “Mkhulu kakhulu. Ngiyakuva ukhuluma ngalokuvela kuYe, epulpiti, usho kutsi Mkhulu kangakanani.” Watsi, “Ukhona yini longaMbona na?”

⁵⁴ Watsi, “Cha, ndvodzana. Akekho lobekanga Mbona,” watsi, “ngoba ungeke nje ukhone kubona Nkulunkulu. Nguloko kuphela. Sifanele nje siKukholwe.”

⁵⁵ Yebo-ke, lomfo lomncane, akumnelisanga. Ngako yena, ngalelinye lilanga, bekanemnakabo lomdzala, umdwebi, emfuleni. Futsi beba khuphukele kuloko lokubitwa ngeSichingi semamayela Lasitfupha. Kungemamayela lasitfupha, sicingi, lesivela eLouisville, eKentucky, siye kulesichingi. Bebakadze badweba enhla lapho, futsi bebabambe kubamba lokuhle kwetinhlanti. Futsi emgwacweni entasi, nako kuta siphepho. Futsi lapho sinetiphepho letinengi, lelo—lelolive lelinemanti, umbane nekudvuma, nemabhudlo lamakhulu emvula. Futsi—futsi ngako emva kwe... Bebadzingeka baye elugwini futsi babesemuva kwetihlahla.

⁵⁶ Futsi emvakwekuba lesiphepho sesiphelile, babuyela emuva esikebheni sabo base bacala kwehla. Kwaku sikhatsini sakusihlwa, noma intsambama, njalo, nelilanga lishona emuva ngalapha eTucson ndzawanatsite. Lalibonisa kukhanya kwalo esibhakabhakeni, futsi kwakukhona umushi wenkhosazane lophume lakugcinakhona emehlo emphumalanga. Nalomdwebi lomdzala bekagwedla sikebhe sakhe ngetigwedlo takhe. Njengoba, yonkhe intfo iyinsha, imvula yase igeze lutfuli, futsi kusikhatsi lesitsandzekako. Futsi ngumuntfu kuphela lotejwayele tigwedlo longatfokotela lesosigci sekunjombita

kwetigwedlo, lapho sikebhe siphanya indlela yaso emantini. Silevu sakhe lesimhlophe silenga, futsi bekasolo abukisisa loyomushi wenkosazana.

⁵⁷ Nalomfanyana, ashisekele, wacalata kutsi abone kutsi lomnumzane lohloniphekile lomdzala bekabukeni. Futsi wamcaphela lomdwеби lomdzala, tinyembeti leticwebetelako tihhohloka esilevini sakhe lesimhlophe. Nalomfanyana, ahleti esitjeni sesikebhe, waba nemdlandla kakhulu waze waphutfuma wabheka ngaseceleni kwesikebhe wase utsi kуломдwebi lomdzala, “Mnumzane, ngitokubuta umbuto kutsi make wami, noma thishela wami waSontfo sikolwa, kanjalo nemelusi wami bekanga—angenelisi kulangatelela kwami kwati lokutsite.”

Watsi, “Kuyini, ndvodzana?”

Watsi, “Ukhona yini longabona Nkulunkulu?”

⁵⁸ Nalomdwebi lomdzala, ngako wancoba ngewakhe... umbuto walomfo lomncane, wadvonsela tigwedlo esikebheni, wase uphonsa imikhono yakhe ngakulomfanyana. Netinyembeti tehla etihlatsini takhe. Watsi, “Nkulunkulu abusise inhlitiyo yakho lencane, s'thandwa. Konkhe lengikubonile, kuleminyaka lengemashumi lasihlanu leyendlulile, beku nguNkulunkulu.” Ya. Niyabona na?

⁵⁹ Ungatfolia lomnengi kakhulu Nkulunkulu, ngekhatsi, kunekutsi ungaMbона noma ngukuphi lapho ubuka khona. Niyabona na? Kodvwa ngaphandle size lesosifiso sekumBона sifiye, ungeke uMbоне. UngaMbона ekushoneni kwelilanga. UngaMuva ekukhaleni kwenyoni. UngaMbukela ndzawo tonkhe. Ukuso sonkhe sandla. Kodvwa lelikhehla lalina Nkulunkulu kakhulu kangako, ngekhatsi kulo, be—bekakhona kubona Nkulunkulu yonkhe indzawo. Futsi ngicabanga kutsi lolo luhlobo lwendlela lesifanele sifune ngayo Nkulunkulu, futsi singambona Nkulunkulu noma ngukuphi lapho sibuka khona.

⁶⁰ Manje, kodvwa, sesibuyeleva emuva ku, “Jesu Khristu longuye itolo, namuhla, naphakadze.” Manje, besiyo—besiyokwati kanjani na?

Uma ngitsite, “Bantfu beMethodisti, niyakukholwa loko na?”

Bebayotsi, “Amen.”

Futsi bengingatsi, “Baptisti, uyakukholwa na?”

“Amen.”

⁶¹ “EmaPhentekhostali, ichurch of God, nakanjalonjalo, niyakukholwa na?”

⁶² “Amen. Siyakukholwa.” Futsi ngiyajabula kutsi niyakwenta. Ngiyakukholwa, nami.

⁶³ Kodvwa, manje, kube-ke besiye ngasedolbheni, kuyotfolia Jesu Khristu, hlobo luni lweMuntfu lebesingalubuka na? Manje,

Wetsembisa kuba natsi kusihlwa. Manje, uma loko kungenjalo, khona-ke Livi alinjalo.

⁶⁴ Wena utsi, “Yebo-ke, Loko akuka phefumulelwa nje.” Khona-ke, kimi, konkhe kwaLo akuka phefumulelwa. Angati kutsi ngukuphi noma ngukuphi loku ngaka phefumulelwa, uma Konkhe kungesilo liCiniso. Niyabona na? Ngeke ngakutsatsa.

⁶⁵ Konkhe nje kuLivi laNkulunkulu. Futsi manje—manje, Wetsembisa kutsi Uyobakhona lapha kusihlwa, “Lapho lababili noma labatsatu babutsene ndzawonye.” Niyakukholwa loko na? Ngiyabonga.

⁶⁶ Manje, ke, uma Anjalo, hlobo luni lweMuntfu lebesingalubuka, kube besihambile siyoMfunna na? Besing—besingatama yini kutfola indvodza leyayigcoke ingubo lendze futsi inetinwele letindze nesilevu na? Ngabe loko, ngabe loko, kungaba nguJesu na? Noma ngubani nje lobekangagcoka i—ingubo lendze futsi abe netinwele letindze nesilevu. Noma ngumuphi umkhohlisi bekangakwenta loko. Kunendvodza lamanengi lagcoka ingubo kusihlwa, akati lutfo ngaNkulunkulu kwendlula li-Hothenthothi belingati ngebusuku baseGibhithe. Kunjalo. Kodvwa aku—akusiko kutsi besingakufuna.

Siyabuka, sifuna lesinye sikhulu, ngoba Bekangesuye.

⁶⁷ Yini lebesingayifuna, ngetibati tetipikili nemidivva yemanyeva na? Noma ngubani umlingisi bekangatigcokisa kanjalo. Bekuyobe solo kungesuYe.

⁶⁸ Futsi sati kanjani kutsi Bekagcoke i—ingubo, nekutsi Bekagcoka kanjani na? Siyakwati kuphela . . .

⁶⁹ Ngabe Bekangabukeka njenetitfombe lesitibonako, ba—badvwebi? Cha. Loyo ngumdvwebo wesayensi lephat selene nekusebenta kwengcondvo umuntfu lotsite lowaba nawo, umcabango wakhe wekutsi Khristu bekangabukeka kanjani. Futsi kube besiye kuloko, ngubani lobekatoba ngulocinisile na? Nango Hofmann, Sallman, futsi tingakhi letinye, tonkhe tincenyte letehlukene taKhe, ngako bewungatsi kudideka kancanya loko Lebekangabukeka angiko. Ngabe Bekangabukeka njengemdvwwebo waHofmann ngaYe, noma Sallman, noma yalabanye babo? Asati. Uma Hofmann acinisile, khona-ke Sallman uneliphutsa. Niyabona na? Sallman ucinisile, khona-ke Hofmann uneliphutsa, futsi, niyabona, bewungeke wati kutsi yini longayibuka.

⁷⁰ Kodvwa besingaMkhomba kanjani na? Yebo-ke, besiyoMkhomba ngendlela lefanako Latikhomba ngayo Yena lucobo ekucaleni, kunjalo, ngemisebenti yaKhe, ngaloko Lakwentile. “Uma Ngingenti imisebenti yaBabe waMi,” Watsi, “khona-ke ningaNgikholwa. Kodvwa uma Ngenta imisebenti, naloku nje ningakholwa, kholwani yimisebenti, ngoba ngiyo lefakaza ngaMi. Bayasho kutsi Ngiyini.” Sitofanele sitfole-ke, kutsi, yini leyaMenta wabonakaliswa. Loko lokwakhomba Jesu

Khristu itolo, kuyokuba yintfo lefanako lebeyifanele iMkhombe namuhla.

⁷¹ Manje, tsine maMethodisti besingacabanga kutsi libandla letfu liyaMkhomba. Besingakucabanga loko. Letfu... Tsine maBaptisti besingacabanga kutsi libandla letfu laMkhomba. Futsi tsine maPhentekhosti... Niyabona na? Ngingwi onkhe. Niyabona na? Loko, besingakwenta. Sicabanga kutsi kwetfu kwaMkhomba.

⁷² Kuyangikhumbuta, bengiseLittle Rock, e-Arkansas. Kungahle kubekhona labanye bebangani bami labakahle base-Arkansas lapha. Ba... Nglobunye busuku, eRobinson Memorial Auditorium, kwakune—nesiceli sihleti esitaladini, lebesinetimboko tekuhamba, futsi satsengisa emapeniseli. Futsi besesiphilisiwe. Futsi ngelilanga lelilandzelako bekasolo ahambahamba, naletimboko ehlombe lakhe, afakaza. Futsi bekasetulu kuvulande wesitsatfu losesitezi, futsi nje bekatsatsa sonkhe siyilo etulu lapho. Futsi kubelukhuni kutsi sishumayele ngenca yemsindvo. Futsi bekamemeta futsi achubeka, bekasolo ehla enyuka netitaladi, kuyo yonkhe indzawo yebhizinisi, afakaza, ahleti ekoneni. Futsi wabitelwa ngephandle, etetsamelini, neNkholi Jesu yamsindzisa.

⁷³ Futsi ngako watsi, “Ngifuna kukubuta umbuto, Mnaketfu Branham.”

Ngatsi, “Yini, mnumzane?”

⁷⁴ Watsi, “Uyati...” BekayiNazarini. Watsi, “Ngikuvile ushumayela, futsi bengicabanga kutsi ungumNazarini.” Futsi watsi, “Ngibone emaPhentekhostali lamanengi kakhulu lapho, khona-ke lomunye wangitjela kutsi bewuiPhentekhostali.” Futsi watsi, “Ngase ngiva lomunye, watsi bewuweLibandla leMissionary Baptisti.” Watsi, “Utsini ke ngaloku na?”

Ngatsi, “Konkhe kuliciniso. Ngiyi Phentekhostali Nazarini Baptisti.”

⁷⁵ Ngako, loko, nguloko—nguloko-ke. Niyabona na? Sitalwa nguMoya waNkulunkulu. Khona-ke, sibobhuti nabodzadze kuKhristu, naletimphawu leti atisho lutfo.

⁷⁶ Ngangivamise kugalela tinkhomo, futsi enhla lapha, nalapho ngangisebenta khona epulazini letinkhomo, na—nasetulu eColorado. NeNhlangano yeHereford idlisa etigodzini lapho eMfuleni iTroublesome. Futsi sinadaladi wemadlelo, nalapho belusi bafaka khona tinkhomo tabo. Umphatsi welipulazi uma lapho, abala letotinkhomo lapho tisendlula. Ngike ngema lapho, sikhatsi lesinengi, nemlente wami ugabance eluphondywensi lwesihlalo selihhashi, ngibukela bagcini bemapulazi etinkhomo. Manje, kukhona tonkhe tinhlobo tetimphawu letiphumela lapho. Lonkhe lumphawu esigodzini lwendlula. Umgcini welipulazi letinkhomo bekangatinaki timphawu, kodywa bekabuke licici lelichaza luhlobo lwengati. Manje, lelocici lelichaza luhlobo

lwengati lalichaza kutsi loko kwakufanele kube yiHereford yeluhlobo noma nakungenjalo beyingeke ikhone kudliswa lwapho kuloko kusuka kulesosigodzi. Beyingeke ingene ngaphandle kwesigcebhezane sengati.

⁷⁷ Ngacabanga, ngalelinye lilanga, nighleti lapho. Ngase ngiyamemeta. Ngatsi, "Uyati, nguleyondlela lokutoba ngayo ekwaHluelweni. Akanawucaphela kutsi banaluphi lumphawu, kodvwa noma sinalo licici lelichaza luhlobo lweNgati. Nguleyontfo." Uma—uma Abona iNgati, singangena. Nguloko kuphela. Niyabona na? Futsi timphawu tetfu tiyobe kadze takhohlwa, ngalesosikhatsi. Kunjalo. Futsi ngijabula kakhulu ngaloko. Kuliciniso. Manje, ini . . .

⁷⁸ Manje, uma singabona kutsi Utikhombe kanjani Yena lucobo itolo, khona-ke sitokwati kutsi Uyoba njani namuhla, ngoba Bekatotikhomba Yena lucobo ngalokufanako namuhla kutsi Bekanguye itolo. Ngabe liciniso lelo na? Khona-ke Bekatokwenta imisebenti yaNkulunkulu. Manje, Bekangeke agcoke . . .

⁷⁹ Bekangeke abe nemfundvo letsite. Asinako lokubhaliwe ngaYe aya esikolweni. Futsi Bekangeke abe sikhulumi lesitsite lesikhulumahale, ngoba sitfola kutsi lulwimi lwaKhe lwalulubi kakhulu—kakhulu, kwaze kwatsi, "Bantfukatana baMuva ngekujabula." Niyabona na? Ngako Bekatoba nguMuntfu nje.

⁸⁰ Kodvwa loko bekuyoMkhomba bekungaba yinkhomba kutsi umBhalo utsi Uyoba nguko. Futsi besinga Mkhomba kanjalo-ke. Futsi nguleyondlela Lakhonjwa ngayo ngalesosikhatsi, ngoba Bekangesuye uMuntfu lotsite kugcoka lokutsite. Beka ngenanhlangano Lebekachosha ngayo. Bekangena—ete tincwadzi letiyichazako letivela kunoma nguyiphi inhlhanganyelo letsite, Lebekangatsi, "Ngiwalelikhulu kunawo onkhe." Noma . . . Niyabona na? Beka nemisebenti yaNkulunkulu kuphela, leyafakazelwa futsi kwakhlunywa ngayo, leyo yayi tomKhomba. Futsi loko kwakutincwadzi taKhe letimchazako. Loko kwakukwakhe.

⁸¹ "Ngubani longaNgilahla ngesono na?" Nesono kungakholwa. Niyabona na? "Ngumuphi kini longaNgilahla na? Uma ngingakenti kona kanye nje loko lebengifanele ngikwente, khona-ke Ngitjeleni lapho Ngehuleke khona," ngalamany'emagama. Niyabona na? Manje, nguleyondlela lokutoba ngayo namuhla lekhonjwako.

⁸² Manje asitfole, ke, kutsi Wakhonjwa kanjani ngalolosuku. Kwaku ngenhlhanganyelo letsite na? Kwakungesimo lesitsite semfundvo na? Kwakungeluphawu lolutsite lwesayensi Lebekanalo na? Noma kwakungiko ngebufakazi lobubonakalako bemBhalo, kutsi Watifikazela Yena lucobo, kutsi BekayiNdvodzana yaNkulunkulu na? "Hlolani imiBhalo," Watsi, "ngoba Ngiyo Lefakaza ngaMi."

⁸³ ImiBhalo ngiyo lefakaza ngaYe. Ngako nguloko lokwaMkhomba, kwaku nguMbhalo. Niyakukholwa loko na? Nguloko lokutofanele kuMkhombe namuhla, ke, khona-ke besitokwati kutsi besicinisile yini noma cha, noma kwakunguYe. Bekafana, Bekatokwenta lokufanako. Manje, ake sitsatse manje...

⁸⁴ Siyafundza kuJohane loNgcwele, futsi asitsatse nje ngekuthula kulemizuzu lelishumi noma lelishumi nesihlanu lelandzelako, bese-ke uyabona kutsi Utobonakala yini futsi afakaze kutsi UnguNkulunkulu, niyabona, abone kutsi Usaphila yini. Sikholwa kutsi Akafi. Nguleyontfo yinye...

⁸⁵ Ngisitfunywa senkholo. Ngishumayele cishe impela etiveni tonkhe ngaphansi kwemazulu, kasikhombisa ndzawo tonkhe. Futsi ngitibonile tonkhe tinhlobo tetinkholo, ngema embikwebatsakatsi nayoyonkhe inkholoze, ngiyacabanga, yonkhe lekhona, ngekwati kwami. Kepha noko, ngayinye ngayinye yayo, Buddha, Mohamede, emaSikhs, emaJain, noma ingaba yini, tonkhe tinemsunguli, futsi wonkhe umcambi ufile. Bangalicaphela lithuna lakhe, futsi nango alele. Nankho ematsambo akhe.

⁸⁶ Kodvwa, buKhristu, kunelithuna lelingenalutfo. Uyaphila. Nentfo lenhle ngako, si—si... Uyafakaza kutsi Uyaphila. Yena, Ulapha manje. Niyabona na? Manje, nguleyontfo umKhristu langaphumula etikwayo, kutsi siyati kutsi onkhe lalamanye emathuna agcwele. Kodvwa lona, kunelithuna lelingenalutfo. “Akekho lapha, kodvwa Uvukile. Futsi sitotjela bazalwane letindzaba letinhle.” Futsi Ulapha, longuye itolo, namuhla, naphakadze.

⁸⁷ Manje sitocala ngaJohane loNgcwele, njengoba sifundza kuJohane loNgcwele. Futsi yonkhe incwadzi eBhayibhelini iyomemetela uMlayeto lofanako. Ifanele. Uma ingekho, ayisiwo umBhalo.

⁸⁸ Manje siyatfola, kutsi, ngesikhatsi Atalwa. Lapha esahlukweni 1 saJohane loNgcwele, sitocala esahlukweni 1. Ngesikhatsi Atalwa, siyakwati kutilwa kwaKhe; nekutsi iNgelosi Gabriyeli yakumemetela kanjani; naMariya unina waKhe; nekutsi Wakhuleliswa kanjani nguMoya loyiNgcwele. Futsi kanjani, aneminyaka lengemashumi lamatsatfu budzala, Wabhabhatiswa ngumzala waKhe, Johane; noma umzala wesibili, Johane umBhabhatisi. Futsi masinyane Watsatfwa wayiswa ehlane kutsi alingwe, tinsuku letingemashumi lamane, base-ke babuyela emuva emandleni aMoya. Emandleni aMoya loyiNgcwele, Wabuyela enkonzwensi yaKhe.

⁸⁹ Futsi khumbulani, Wala bafundzi kutsi baphindze bashumayele, noma bente noma yini, baze baye emandleni aMoya. Niyabona na? “Lindzani edolobheni laseJerusalema nite nembatsiswe emandla lavela ngeTulu.” Niyabona na?

Awukafaneli uphume uze ungabi nguwe, kodvwa Nkulunkulu, bantfu bangabona kubonakaliswa kwaJesu Khristu kuwe. Khona-ke bantfu batokholwa, ke, ngoba kungeke kube nguwe, kutoba nguYe. "Futsi bonkhe labo Lebekabati ngaphambili, Uyobabita." Bayokubona. "Timvu taMi tiyalati liPhimbo laMi." Manje, siyacaphela kutsi, ke, masinyane ngesikhatsi Angena enkonzweni yaKhe.

Ngitobita baligiswa labambalwa.

⁹⁰ Ngifuna nikhumbule intfo yinye. Kunetive letintsatfu kuphela tebantfu emhlabeni. O, sinetive letinengi, kodvwa kunalabatsatfu kuphela, futsi loko kuvela kuHamu, Shemu, nebantfu bakaJafethi. Lelo kwakuliJuda, weTive, nemSamariya. Siyatfola, ngesikhatsi Moya loyiNgcwele anikwa, Phetro wanikwa tikhiya, waLivula ku-kumaJuda ePhentekhosti, eJerusalem; kumaSamariya; nakubeTive endlini yaKhoneliyusi, Tento 10:49. Futsi kusukela ngalesosikhatsi bekuseveni kuto tonkhe tive. Futsi bekanetikhya, kutivula kuletive leti.

⁹¹ Manje, beTive bebangafuni kwasa Mesiya. Sasi ngemahedeni, tsine ma-Anglo-Saxon. Sasinetagila emihlane yetfu futsi sikhonta tithico. Futsi sasingakabheki kwasaMesiya. Kodvwa emaJuda bekafuna Mesiya. NemaSamariya, bekabheke Mesiya, lobekaliJuda hhafu neweTive.

⁹² Manje, siyati kutsi Uyabuya kuphela futsi atikhombe Yena lucobo kulabo labaMfunako. Futsi nguleyondlela lokuyoba ngayo ekuBuyeni kwaKhe kwesibili. Live aliyukwati lutfo ngaYe. Utofika nje, atsatse liBandla laKhe futsi ahambe, nalabo labangaMfuni batoshiywa ngemuva. Uta kuphela kulabo labaMfunako.

⁹³ Manje, Weta esiveni sakubo lucobo, kumaJuda. Manje ake sibuke kutsi Watikhomba kanjani Yena lucobo. Intfo yekucala lesiyitfolako, kwakungu-Andreya lapha, naFiliphu. Na-Andreya bekevile ngajesu. Futsi behla, ngoba bebakadze babafundzi baJohane. Futsi lapho basahamba manje... Futsi bebatfole imisebenti yaKhe lemikhulu, futsi baya ekhaya naYe. Abuye ngekusa lokulandzelako, eneliseke ngalokugcwéle kutsi loyo kwakunguMesiya.

⁹⁴ Manje siyatfola kutsi Andreya uyahamba futsi utfola umnakabo, Simoni, lowase ubitwa ngaPhetro kamuva. Manje, uma nitodadisha umlandvo waSimoni Phetro, yena na-Andreya, bavela ekhaya lelikholwa impela, baFarisi. Babe wabo beka ngulelikhulu, likholwa lelicinile. Futsi bekatjele indvodzana yakhe, "Manje, emadvodzana, kutofika i... Sonkhe sibukile kusukela phansi emnyakeni kwaMesiya lotako, kusukela sona kanye setsembiso ensimini yase-Edeni. Kodvwa manje, ngaphambi kwekutsi Efike, kutawuba

nekudideka lokuncanyana, ngoba Sathane utokhipha yonkhe intfo mbumbulu langayenta, niyabona, kuvimbela iNtfo sibili.”

⁹⁵ Uhlala njalo akwenta loko. Uhlala njalo akwenta loko. Kodvwa, khumbulani, lapho nibona khona lidola mbumbulu, lifanele libe likhona lidola mbamba ndzawanatsite lelentiwe ngalo. Uma ubona umuntfu adlala incenye yemzenzisi, khumbulani nje, kunendzatjana yelucobo ndzawanatsite, layilingiselako.

⁹⁶ “Ngako, akungabateki kutsi loko kwakutokwenteka. Kodvwa,” watsi, “manje, emadvodzana, naku lenikukhumbulako. Sifanele siwukholwe umlayeto weliBhayibheli. NaMosi, inceku yetfu, inceku yaNkulunkulu leyasinika imiyalo yetfu nemitsetfo yetfu, washo kutsi iNkhosi Nkulunkulu wetfu iyovusa umprofethi emkhatsini wetfu, lonjengaye. Futsi manje, uma Mesiya efika, liBhayibheli litsi Uyoba ngumprofethi. Futsi niyati kutsi si—siyatjelwa kutsi semukela umprofethi kuphela emvakwekuba akhonjwe nguNkulunkulu kutsi abe ngumprofethi.”

⁹⁷ Futsi nonkhe nine bafundzi beliBhayibheli niyati kutsi Livi leNkhosi leta kubaprofethi, loko kuphela. “Livi leta kubaprofethi kuphela.” Futsi indlela kuphela lomuntfu layokhonjwa ngayo... Sekuyiminyaka lengemakhulu lamane. Malakhi bekayoba ngumprofethi wekugcina.

⁹⁸ Futsi manje watsi, “LoMesiya lona, uma Afika... Kungahle kubekhona boMesiya bemanga labavukako. Kungahle kubekhona tonkhe tinhlobo tetintfo letentekako. Kodvwa uma Afika, Nkulunkulu uyoMkhomba. Uyoba ngumprofethi. LiBhayibheli litsi Uyoba ngumprofethi. NeliBhayibheli latsi, ‘Uma akhona emkhatsini wenu longuwakamoya noma umprofethi, Mine iNkhosi Ngitawutatisa kuye, ngikhulume naye ngemibono, nakanjalonjalo. Futsi uma loko lakushoko kufezeka, khona-ke muveni. Kodvwa uma kungafezeki, khona-ke ningamuva.’”

⁹⁹ Loko kwetsembeka nje futsi nje njenge... Loyo ngumuzwa. Uma loko lakushoko kulungile, kufanele kube ngiko ngaso sonkhe sikhatsi. Ungeke nje ukucagele. Kufanele kube ngulokucinisile. Uma kulungile, kufanele kube nguNkulunkulu. Futsi uma kungakalungi, khona-ke akusuye Nkulunkulu. Ngako loko nje yi... Futsi ngako bebatı kukholwa loko. Onkhe emaJuda bekakwati loko, emaJuda eliciniso.

¹⁰⁰ Kodvwa, ngalolosuku, libandla lalinentfo letsite njengoba linjalo namuhla, litsite kutsamba, futsi lisuka kutivumokholo, futsi baphambukela eklasini netifo letelakanyene te... nekugeza emabhodo. Futsi njengoba Jesu atsi, “Nitsetse emasiko enu futsi nenta imiYalo yaNkulunkulu yangabi namsebenti kini.” Ngelisiko labo, nguloko lebebakwentile, lokunenginengi njengananamuhla, kuphindzeka kwesikhatsi.

¹⁰¹ Manje caphelani loku. Manje, ngesikhatsi Andreya anelisekile kutsi loyo kwakunguMesiya, liBhayibheli alikubhali nje loko lakwenta. Kodvwa wahamba futsi walanda Phero, noma ligama lakhe kwakunguSimoni ngalesosikhatsi. Wase utsi, “Simoni, ngifuna ute futsi uve loMuntfu. Umprofethi entasi eJordani watsi loMuntfu uyofika. Nemprofethi watsi wabona uMoya waNkulunkulu, njengelituba, lita etikwaKhe. Futsi bekati kutsi lena kwakuyiNdvodzana yaNkulunkulu. Ngifuna nite niMuve. KunekuKhanya, sibonakaliso, lesiMlandzelako.”

¹⁰² Ngako sengatsi ngiyamcabanga Simoni amancikancika kancane ngekuta. Kodvwa, ekugcineni, ngesikhatsi enyukela eBukhoneni baJesu... Manje, kucabangeni manje, sitofola tincwadzi letimchazako, inkhomba, kutsi Bekayini. Futsi uma... Ngisasolo ngikuJohane loNgcwele, sahluko 1. Futsi ngesikhatsi Jesu abona Simoni eta kuYe, Watsi, “Bukani umIsrayeli.” Wakhuluma, futsi wamati. Watsi, “Ligama lakho unguSimoni. Uyindvodzana yaJonase.”

¹⁰³ Loko kwakhipha lesitashi kuye. Wati kanjani kutsi ligama lakhe kwakunguSimoni na? Futsi Wamatyi kanjani loyobabe lomdzala lomesabako nkulunkulu embikwakhe, lobekamfundzise indlela na? Bekati kutsi lowo kufanele kube nguMesiya. Kwakungumprofethi. Futsi masinyane wawela etinyaweni taKhe. Angenamfundvo, angena—nakunelwati emvakwako, futsi bekatinikele kakhulu, waze Jesu Khristu wamnika tikhiya teMbuso, futsi wamenta inhloko yelibandla eJerusalema. Ngoba masinyane nje loko... Jesu watikhomba Yena lucobo ngekutsi, “Ligama lakho unguSimoni, futsi uyindvodzana yaJonase,” lobekangubabe wakhe. Loko kwenta Jesu ngalokuphelele loyomprofethi. Phero wakukholwa.

¹⁰⁴ Manje, sitfola kutsi kwakukhona munye eme lapho, ligama lakhe nguNathanayeli noma... Filiphu, ngikholwa kutsi kwakunguye. Filiphu bekeme ngalapho, futsi wabona loku. Ngako, beka ngumIsrayeli locinile, futsi bekati lapho kwakunemnaketfu lebebadadishe ndzawonye. Manje, uma wake waba seJerusalema futsi ubone lapho Jesu bekashumayela khona, nekutsi Filiphu bekadzingeka aye khashane kangakanani, luhambo lwelusuku kugega tintsaba, kuya lapho umngani wakhe Nathanayeli bekakhona, lobekangumfundzi weliBhayibheli. Ngako uyesuka, masinyane, emvakwekuba sekatfolile kutsi kwakuyini liCiniso. Bekakubonile kusebenta. Bekenelisekile, loyo kwakunguMesiya.

¹⁰⁵ O, kube kuphela besingaba naloyomdlandla, kube kuphela besingatfola leyontfo lefanako ngekhatsi kwetfu, uma sati kutsi silitfolile leloPharele.

¹⁰⁶ Wagega intsaba. Akungabateki kutsi watfola Nathanayeli. Weta ekhaya lakhe, futsi—futsi mhlawumbe wanconcotsa emnyango. Nemkakhe watsi, “U—Ungaphandle engadzeni

yemivini.” Mhlawumbe abehlanyele imincumo. Futsi waphumela engadzeni yemivini. Futsi ngekuba ngumnumnzane lohloniphekile longumKhristu, akamkhatsatanga ngesikhatsi asakhuleka.

¹⁰⁷ Bekaguce ngemadvolo akhe, akhuleka. Mhlawumbe bekakhuleka kanjena, “Nkhosi Nkulunkulu, Jehova, sengiyaguga. Futsi ngibukile futsi ngalangatelela kubona Mesiya. Ake ngiMbone ngingakahambi.”

¹⁰⁸ Futsi watsi nje angatsi, “Amen,” wase uyasukuma, kwase-ke kuma Nathanayeli. Manje, caphelani, hhayi incumbi lenengi yekuchubeka. Bekane—bekanemyalo.

¹⁰⁹ Intfo yako ikutsi, namuhla, sinalokunengi kakhulu kugega nekwenta letinye tintfo. Futsi asifinyelele eluphawini. Ngabe UnguNkulunkulu yini noma Akasuye Nkulunkulu na? Ngabe Unguye itolo, namuhla, naphakadze, noma Akafani na? Ngabe U—ngabe Usenguye Jesu na? Ngabe Uvukile kulabafile na? Ngabe Uvukile na? Uma Angakwentanga, khona-ke kukhohlweni. Uma Akwentile, asicalise umdlalandia wetfu. Asigcwaliswe ngaMoya waKhe, sikhuleke futsi sicale umhlangano. Sente lokutsite.

¹¹⁰ Caphelani, wacondza ngco ephuzwini, “Wota, ubone kutsi Ngubani lesimfolile: Jesu waseNazaretha, iNdvodzana yaJosefa.”

¹¹¹ Manje, kwangatsi ngiyayibona yona impela lendvodza yelibandla lemtsetfo itsintsitsa imphahla yayo—yayo, ngekuguca ngemadvolo elutfulini. Watsi, “Awume kancane lapha, Filiphu. Ngikwati kutsi uyindvodza lebhndlile, kodvwa mhlawumbe sewuhambe waya ekugcineni lokujulile, uyati. Manje, lapha, sidadisha umBhalo ndzawonye. Futsi siyati kutsi... Bewungatsini, ‘Jesu waseNazaretha?’ Manje, uconde kungitjela kutsi Nkulunkulu Somandala bekangaya kulesosicuku lesiphansi kakhulu njengaleso entasi lapho eNazaretha,” kabi kakhulu kwendlula iTucson, “futsi ngehlele lapho, futsi,” noma iJeffersonville, lapho ngivela khona, “entasi lapho kulelodolobha lelinelunya, bese utsatsa intfo letsite entasi lapho na? Ngani, niyati umphristi lomkhulu uyakholwa kutsi Utokwehlisa emavulande lavela eZulwini, ahambe ehlele ngco ebaleni, niyati. Futsi sifundziswe loko.”

¹¹² Kodvwa, niyati, Akefiki njalo ngendlela lesicabanga kutsi Uta ngayo. Niyabona na? Uta atfobeke kakhulu. Bantfu bakulungise konkhe ngendlela labafuna Yena ete ngayo. Futsi si—sihamba ngetulu kwekutitfoba, futsi ngulapho la utfola khona Nkulunkulu. Bososayensi namuhla bangatfumela indvodza emkhatsini, emkhondwveni wekuhamba kwemhlaba, futsi ihambe etikwelidlebe letjani lengati lutfo ngalo. O, ufanele uitfobe, kute watii Nkulunkulu. Ufanele ususe imibono yakho

lucobo, futsi nje uvule inhlitiyo yakho nekuphila kuYe, khonake Utotenta atiwe Yena lucobo.

¹¹³ Yebo-ke, sengiyamuva atsi, “Kungabakhona yini lokuhle lokuvela eNazaretha na?”

¹¹⁴ “Ingabakhona yini intfo lephuma kulabobagiciki labangcwele, noma ngabe yini lofuna kukubita ngako na? Uma noma yini itokwentiwa, kuyokwentiwa ehlelwени lami, kukwami. Niyabona na? Ngulapho bekutofika khona. Niyabona na? Kungabakhona yini lokuhle lokuvela esicukwini lesinjengaleso na?”

¹¹⁵ Manje, ngicabanga kutsi Filiphu umnika imphendvulo lenhle kunato tonkhe noma ngumuphi umuntfu lebekangayiniketa. Watsi, “Wota, ubone.”

¹¹⁶ Ungahlali ekhaya futsi ukugecke. Wota utitfolele wena. Uyabona na? Uyabona na? Wota ubone. Letsa liBhayibheli lakho bese uyalihlola, ubone kutsi licinisile yini. Nguloko wonkhe umuntfu lafanele akwente. Niyabona na? “Wota, ubone.”

¹¹⁷ Asibhobokele engcogcisanwaneni yabo lapho basahamba etingwini taseGalile, beta ngalapho. Kwangatsi ngiyabona, ngimuva asho loku, “Niyakukhumbula loko lokudzala... Niyati, si—silikhulumile liBhayibheli ndzawonye. Sihleti ndzawonye etindzaweni tasezulwini, njengoba sibuka eBhayibhelini futsi sati loko, ngalelinye lilanga. Manje, Nathanayeli, ufuna kukubuta lokutsite. Utoba yini Mesiya uma Efika na? Sitokwati kanjani kutsi UngoMesiya na?”

¹¹⁸ Ngani, Nathanayeli, angumfundzi lokahle weliBhayibheli, watsi, “Ngani, Uyoba ngumprofethi. Impela, liBhayibheli latsi Uyoba ngumprofethi. Kulungile, khona-ke siyoMati.”

¹¹⁹ “Uyamati loyomdwebi lomdzala longati lutfo entasi lapho, lowatsenga leyonhlanti kuye ngalolosuku, futsi bekangenayo imfundvo leyenele kusayina sigcebhezane?”

“Ya, ngiyamkhumbula. Simoni, ya, ndvodzana yaJonase.”

¹²⁰ “Ngesikhatsi umnakabo ahamba futsi wamlandza wamletsa lapho Bekakhona, Wema futsi wambuka ebusweni ngco wase utsi, ‘Ligama lakho unguSimoni, futsi uyindvodzana yaJona.’ Niyati, bekungeke kungimangalise, Nathanayeli, kodvwa kutsi Bekatotsini, ‘Ligama lakho unguNathanayeli,’ uma ufika lapho. Niyabona na?”

¹²¹ “A, ngifanele ngibone. Niyati, kubona kukholwa,” ngisho lokuvela eMissouri. Ngako sifike satfola, kutsi lapho bachubeka emgwacwensi.

¹²² Futsi kwatsi nje Nathanayeli angangena eBukhoneni baJesu Khristu, wentani na? Kwentekani ngesikhatsi efika lapho Jesu bekakhona na? Watsi, “Bukani umIsrayeli lokungekho nkhohliso kuye.”

¹²³ Yebo-ke, loko impela kwayipantjisa lendvodza. Futsi yatsi, “Rabi,” lokuchaza kutsi *thishela*, “Uke wangati nini na? Angikaze ngiKubone emphilweni yami. Ngihlala emamayela lalishumi nesihlanu kugega lensesaba lapha, futsi angikaze ngive ngisho ngaWe kwaze kwaba kuyitolo ntsambama. Futsi naku ngita lapha futsi wena U—futsi wena Ungitjela kutsi ngingumIsrayeli.”

¹²⁴ Yebo-ke, wena utsi bekungenza yendlela lebekagcoke ngayo. O, cha. Bonkhe baseMphumalanga bagcoka kanjalo, futsi bayekela silevu. “Wena ungumIsrayeli lokungekho nkohhliso kuye.” Manje utsini ke ngaloko?

Watsi, “Rabi, Uke wangibona nini?”

¹²⁵ Watsi, “Itolo, ngesikhatsi ungaphansi kwesihlahla, ngaphambi kwekutsi Filiphu akubite, Ngikubonile.” Jesu Khristu longuye itolo, namuhla, naphakadze. Niyabona?

¹²⁶ Watsini ke? Umphristi wakhe angahle kube bekeme lapho. Kungahle kube kwakukadze kunencumbi yebagceki lebebeme lapho, lebebakhona. Kodvwa wagijima wenyukela kuYe, wase utsi, “Rabi, Wena uyiNdvodzana yaNkulunkulu. Wena uyiNkhosi ya-Israyeli.” Ligama lakhe alicimeki kusihlwa. Libhalwe eNcwadzini yekuPhila yeliWundlu.

¹²⁷ Kwakunalabo labeme lapho, kusobala, lebeba ngakukholwa loko. Impela. Bona batsi, “Lomuntfu ungumbhuli. UnkuBhelzebule.” NaJesu wagucuka. Leni? Bebefanele baphendvule libandla labo ngalokutsite. Imisebenti yayikadze yentiwe. Be—be—bekulapho. Ngako watsi, “Lomuntfu unguBhelzebule, umbhuli, umfundzi-micabango, noma lokutsite.”

¹²⁸ Jesu watsi kubo, “Nikhulumu loko ngekumelana neNdvodzana yemunfu, nitawu tsetselelwa kona. Kodvwa ngalelinye lilanga Moya loNgewe uyeta, futsi uma ukhulumu...kwenta intfo lefanako. Futsi uma ukhulumu livi lelimelene naLoko, angeke utsetselelwe kona, kulelive leli noma eveni lelitako.” Angeke kuze kutsetselelwe. Manje, leso kwaku ngulesitukulwane lesikuso manje.

¹²⁹ Manje sine situkulwane sekucala lesikhonjiwe. Singadvonsa lokunengi, kodvwa asambeni manje, ngoba sitofanele sicale lilayini lala bakhulekelwako. Kwaku nemaJuda, libandla lemstsetfo sibili. UmKhristu sibili, emakholwa labitwenkuNkulunkulu ayakucondza loko khona manje.

¹³⁰ Khona-ke ngalelinye lilanga Bekaya entasi eJerikho, kodvwa Beka nesidzingo sekuya ngaseSamariya. Ngiyatibuta kutsi kungani? Bebafuna Mesiya, kodvwa tsine beTive besingakambheki.

¹³¹ Kodvwa manje sibuke Mesiya. Niyabona na? Niyabona, sesibe neminyaka letinkhulungwane letimbili, njengoba

bebanayo iminyaka letinkhulungwane letimbili. Niyabona na? Kodvwa sesibe neminyaka letinkhulungwane letimbili, siMfuna. Sivile ngaYe, kodvwa manje sibuke Yena kutsi efike kwesibili.

¹³² Futsi manje siyacaphela kutsi Bekanesidzingo sekwenyukela eSamariya. Loko kusetulu entsabeni. Futsi ngesikhatsi Enyukela eSamariya. Kufanele kutsi kwase kusemini, ngako Watfumela bafundzi baKhe edolobheni kuyotsenga lokudliwako. Edolobheni kwaphuma wesifazane lomncane.

¹³³ Manje, uma nifuna, kube benginesikhatsi, benginga kuhlatiya loko futsi ngnitjеле kutsi kungani efika ngaleso sikhatsi selusuku. Bonkhe besifazane labatiphetse kahle kutofanele bahlangane ndzawonye. Labatiphetse kabi nalaba hloniphekile abakahlangani ndzawonye. Bangeke batfolakale esiveni, ngesikhatsi lesifanako, ngisho nakulolusuku. Manje, bekabekwe luhpawu, wesifazane loneligama lelibi. Niyati kutsi ngikhulumna ngani: ingwadla.

¹³⁴ Manje, sitfola kutsi wenyukela lapho cishe ngensimbi yelishumi nakunye emini kute, akhe emanti. Futsi ake sicabange, beka nguwesifazane lokhanga kakhulu. Futsi bekaneludziwo lwakhe lwemanti ehlombe lakhe. Futsi kutsi nje kwenyuka . . .

¹³⁵ Ngibabonile babeka libhodo linye enhloko yabo, nalelinye engculwini ngayinye, futsi bahambe, bakhuluma njengoba besifazane bebangenta, futsi bangacitsi ngisho litfonsi lawo. Futsi, bona, kuyekelela lokunje pho! Angati kutsi bakwenta kanjani. Kodvwa, lapha, ahamba lapho, futsi bekanaloku, kunetibambo letimbili kuko. Bese-ke baya emtfonjeni. Kunesigwedlo, futsi ukwehlisela phansi bese ukha emanti, bese-se ubuye uyakudvonsa ukwenyuse.

¹³⁶ Futsi lona kwaku ngumtfombo waJakobe, lapho Jesu . . . Ngaphandle kwelidolobha nje. Kwaku ngumtfombo wesive. Nalapho Jakobe bekagubhe khona umtfombo futsi wanatsisa tilwane takhe lapho, futsi ngako bekanatsa kuwo, cobo lwakhe.

¹³⁷ Futsi ngako sitfola lona wesifazane eta kutothka emanti akhe, futsi wacala kwehlisa libhodo. Ake sicabange kutsi bekocabanga ngebusuku bangayitolo. Futsi wavumela, wacala kwehlisa sigwedlo, lapho wahhuka letibambo etikwe—kwemikhono yeludziwo, kulwehlisa kukha emanti.

¹³⁸ Futsi weva iNdvodza itsi, “Ase uNginatsise.” Futsi lo—lomtfombo lapho, uma wake waba lapho, yindzawo lencane lebonakala yonkhe indzawo, intfo lenjengalena lapha kusihlwa. Futsi kunemvini lomila elubondzeni. Futsi ngako leliJuda belihleti ngale elubondzeni.

¹³⁹ Futsi wabuka laphaya wase ubona leliJuda lihleti lapho liyeme lubondza. Wase utsi, “Akusilo lisiko kini nine maJuda kucela noma yini kumSamariya. Asidlelani lomunye nalomunye.” Ngaphandle kwaloko, kwaku nekuhlukana. “Futsi

asidlelani, lomunye nalomunye. Futsi Wena uyiNdvodza, futsi ucela mine, wesifazane longu mSamariya, kutsi uKunatsise.”

¹⁴⁰ Futsi BekaliJuda phaca. Beka ngakagcoki lokwehlukile. Beka nguMuntfu. Ngicabanga kutsi batsi, kuJohane loNgewe 6, Bekacishe abeneminyaka lengemashumi lamatsatfu nakubili kuphela budzala. Kodvwa Wabuka, kufanele kutsi bekabukeka anemashumi lasihlanu, ngoba batsi, “Wena unguMuntfu longakendluli nase mashumini lasihlanu eminyaka budzala, kepha noko Utsi Wena‘ubone Abrahama.”

Watsi, “Angakabikhona Abrahama, NGIKHONA.”

¹⁴¹ [Akucoshwanga etheyiphini—Umhl.] “...unga, ungeti lapha kutokha.” “Ngani,” watsi, “lomtfombo ujulile, futsi Utowentani ngawo na? Ungakha kanjani na?”

¹⁴² Watsi, “Lamanti leNgiwaniketako angemanti emphefumulweni.” Nekucocisana kwachubeka. Manje, ufanele utsatse livi lami ngaloku, Bekachumana nemoya wakhe. Niyabona na?

¹⁴³ Manje, bekanguwesifazane, wesifazane munye aphuma eSamariya. Futsi watsi, “Bobabe betfu banatsa kulomtfombo, futsi—futsi Wena utsi Unemanti lamakhulu kunalona na?” Wase utsi, “Futsi Wena utsi, ‘Kukhulekwe eJerusalema,’ nabobabe betfu bakhuleka kulentsaba,” nalokunye nalokunye.

¹⁴⁴ Kucocisana kwakusolo kuchubeka. Emva kwesikhashana, ngesikhatsi, Atfola nje kutsi yayiyini inkhatsato yakhe. Bangakhi lowatiko kutsi inkhatsato yakhe yayiyini na? Impela. Wattfola lapho inkhatsato yakhe yayikhona. Watsi, “Hamba ulandze indvodza yakho futsi nite lapha.”

Watsi, “Anginandvodza.”

¹⁴⁵ Manje, khumbulani, Wentani na? Atikhomba Yena lucobo kumaSamariya manje. Wakwenta kanjalo-ke kuma—kumaJuda. Manje, bukisisani kutsi lomSamariya utotsini.

Watsi, “Hamba ulandze indvodza yakho ute lapha.”

“Ngani,” watsi, “Anginandvodza.”

¹⁴⁶ Watsi, “Ukhulume liciniso, utsi ‘awunayo indvodza,’ ngenca yekutsi bewunalahiylanu, nalena lohlala nayo manje ayisiyo yakho. Futsi ukhulume liciniso.”

¹⁴⁷ Manje bukisisani loyo wesifazane, loyo wesifazane waseSamariya, imphendvulo yakhe kuloko. Bekati kakhulu ngaNkulunkulu kunanoma nguhhafu webantu base-United States, niyabona, impela, niyabona, kufaka ekhatsi bashumayeli, ngalesinyye sikhatsi. Ya. Niyabona na?

¹⁴⁸ Bukani labo baphristi beme lapho. Ngesikhatsi babona loko kwentiwa, batsi, “LoMuntfu ungumbhuli. Ungo Bhelzebule,” batama kutfola lenye indlela Lakwenta ngayo, lisu lelitsite, lichinga lelitsite. Niyabona na?

¹⁴⁹ Kodvwa lona wesifazane lomncane watsi, “Mnumzane, ngiyabona kutsi unggumprofethi Wena.” Bukisisani. “Siyati, siyati kutsi kukhona Mesiya lotako, lokutsiwa nguKhristu. Futsi uma Efika, nguloku Latokwenta.” Amen.

Watsi, “NginguYe, lolokhuluma nawe.”

¹⁵⁰ Loko kwakwenele. Bekati kutsi loko kwakungiko. Bukisisani kutsi wentani. Waphutfuma wangena edolobheni, futsi watjela emadvodza elidolobha, “Wotani, nibone uMuntu Longitjele tintfo lengitentile. Lolu ngabe akusilo luphawu lwakhe impela Mesiya na? Kunini lapho lasake saba nako seloku kwaba sikhatsi na? Nangu Mesiya wangempela.”

¹⁵¹ Watikhomba kanjalo-ke yena lucobo nemaJuda. Watikhomba kanjalo-ke Yena lucobo nemaSamariya. Manje, loko kwakukuphela kwesikhatsi sabo.

¹⁵² Manje, beTive sebabe neminyaka letinkhulungwane letimbili yekufundzisa, njengoba bebanetinkhulungwane teminyaka yekufundzisa. Kodvwa uma beTive bangatfoli intfo lefanako labanayo, khona-ke Usaba umuntu. Ngako besingaMati kanjani namuhla na? Ngesikhatsi Ema natsi, futsi angekhatsi kitsi, futsi asebenta ngatsi, futsi wafakazela kutsi loMoya, lesiwubita ngembhabhatiso waMoya loNgewe, nguJesu Khristu atibonakalisa Yena lucobo esimeni saMoya esidalweni lesingumuntu, enta lokufanako. Watsi kuJohane loNgewe, sahluko se 14, livesi le 12, “Loyo lokholwako,” hhayi lotentisako. Kodvwa, “Loyo lokholwa ngiMi, lemisebenti lengiyentako Mine naye utoyenta.” Akusilo liciniso loko?

¹⁵³ Watsi, kuJohane loNgewe 5:19. Wendlula echibini laseBhethesda. Ngisasolo...Leso sahluko se 4 saJohane loNgewe. Manje ngise sahlukweni se 5. Esahlukweni se 5 saJohane loNgewe, Wendlula echibini laseBhethesda. Nako kulele ticuku letinkhulu. Kubita tinkhulungwane letimbili kwenta sicuku sinye. Ngako kuneticuku tebantfu kulesibhedlela lesikhulu sakamoya, njengoba kwakunjalo, balele esangweni lemvu balindzele kunyakata kwemanti.

¹⁵⁴ Nkulunkulu bekahlala njalo anendlela yekuphilisa kwaNkulunkulu yemakholwa. Niyabona na? NeNgelosi yehla yase itamatamisa emanti. Noma ngumuphi kini lowati kutsi yini emanti latanyatanyisiwe, niyabona, ligagasi liya nganhlanye, nemoya ushaya ujikele kulenye. Ngemanti latanyatanyisiwe. Futsi kwaku nguleyoNgelosi ita emantini, iwashayisa indingilizi. Futsi wekucala wangena, ngekukholwa, wasusa emandla emantini, wase uyaphiliswa.

¹⁵⁵ Jesu wendlula kulelicembu lebantfu lapho, futsi Bekati kutsi umuntu lotsite bekalelephi, lobeka nebutaksaka iminyaka lengemashumi lamatsatfu nesiphohlongo. Mhlawumbe bekanenkinga yelidlala lebesilisa noma—noma lokutsite. Kwakungeke kumbulale. Kwakumkhubatile. Bekanako

iminyaka lengemashumi lamatsatfu nesiphohlongo. Futsi Wahamba waya kuye, wase utsi, "Uyatsandza yini kusindza?"

¹⁵⁶ Akakushongo ngani Yena kulabatishosha, labachutako, timphumphutse, noma labahlaselekile na? Bebasekhatsi lapho netinswane letinetinhloko letinemanti. LiBhayibheli latsi, "Bebatishosha, timphumphutse, labachutako."

¹⁵⁷ Lendvodza yayikhona kuhamba. Yatsi, "Uma ngehla, lomunye uyangengcelela." Kodvwa, khumbulani, Bekati kutsi lomuntfu bekakadze alapho. Niyakutfola na?

¹⁵⁸ Futsi Watsi, "Tsatsa umbhedze wakho uye endlini yakho." Akukho mbuto ngaloko. Wachubeka, ngoba Bekati kutsi bekatokwenta.

¹⁵⁹ Bamtfola aphetse umbhedze wakhe, ngelusuku lweliSabatha. Wabitelwa ekhatsi. Kuyoba yintfo lefanako kusihlwa.

¹⁶⁰ [Lomunye umfo utsi, "Mnaketfu Branham, ngifuna Moya loNgcwele."—Umhl.] Uma—uma—uma indvodza kusihlwa... Nkulunkulu akubusise, mnaketfu, kuKwemukela.

¹⁶¹ Uma umuntfu kusihlwa aphilisiwe, futsi angakufakazela, kutsi waphiliswa, uyati ngekhatsi kwakhe kutsi waphiliswa, nenkhatsato yelidlala lebesilisa, ucabanga kutsi kwaku tokwentekani kusasa na? Lomunye bekangatsi, "Ngiyati umuntfu lotsite uhleti ekoneni. Ngiyati lapho kukhona umuntfu lokhubatekile. Ngiyati kutsi *loku* kukuphi, noma *loko* kuyini. Hamba ubaphilise." Niyabona, lowo ngulowodeveli lofanako.

¹⁶² Jesu wabutwa. Lalelani kutsi Watsini kuJohane loNgcwele 5:19, "Ngicinisile, ngicinisile, Ngitsi kini." Futsi *ngicinisile* kuchaza kutsi, "Impela, Ngitsi kini, iNdvodzana ingeke yente lutfo ngekwaYo lucobo, kuphela loko Lebona uYise akwenta. Loko iNdvodzana iyakwenta kanjalo." Niyabona na? Akentanga lutfo waze kucala Wabona Babe aMkhombisa loko embonweni. Loko kwaMenta Nkulunkulu-mprofethi.

¹⁶³ Futsi namuhla Usenguye, loNkulunkulu lofanako, uMoya loyiNgcwele lofanako lohlala emkhatsini webantfu. SiMemukele, ngesimo sembabhatiso. SiMemukele, ekukhulekelaneni. SiMbonile akhuluma ngaletinye tilwimi. SiMbonile akuhumusha. SiMbonile enta letibonakaliso leti letinkhulu telusuku.

¹⁶⁴ Futsi manje sichubekela kulenye intfo. Sibe nalokunengi kulingisela. Sibe nalokunengi kwaletintfo leti, kodvwa loko akukususi eCinisweni leliBhayibheli. Usenguye itolo, namuhla, naphakadze. Usenguye Jesu Khristu. UyiNdvodzana yaNkulunkulu. Uyaphila kute kube phakadze.

¹⁶⁵ Watsi, "Kusesikhashana nje nelive..." Leyo yikhozimosi, luhlelo lwelive, licembu lelihlelo lelijwayelekile. "Ngeke lisaNgibona. Noko nine nitoNgibona, ngoba Ngi..." Futsi

“Ngi” sabito selucobo. “Ngitawuba nani, ngibe ngisho nakini, kute kube sekupheleni kwemhlaba, kuze kube sekuphelelisweni. Mine, Mine covo lwaMi ngitawuba kini, ngisebenta imisebenti yaMi lefanako leNgayenta, yonkhe indlela kuze kube sekuphelelisweni, sikhatsi sekugcina.” “Longuye itolo, namuhla, naphakadze.” Nkulunkulu sisite kutsi sikukholwe.

¹⁶⁶ Manje ngitonibuta umbuto, uma Atobonakala lapha emkhatsini wetfu kusihlwa. Manje, ngifuna nati loku, kutsi ayikho intfo lekutsiwa ngumphilisi waNkulunkulu, akukho ngetulu kwekutsi kukhona uMsindzisi waNkulunkulu emhlabeni namuhla. Ulapha esimeni saMoya loyiNgewe, futsi Ulapha kuphela kucinisa loko Lesavele akwetsembisile. Ulapha, enta Livi laKhe libonakaliswe. Ngesikhatsi Afika kwekucala, Wafakaza kutsi BekanguMesiya ngaloko Lebekakwenta. Kwafakazela kutsi kwaku nguMesiya.

¹⁶⁷ Manje, Watsi, “Njengoba kwakunjalo emihleni yaNowa, nasetinsukwini taLoti.” Etinsukwini taNowa, emanti efika. Etinsukwini taLoti, umlilo wefika. Sifunani manje? Umlilo. Bukisisani kutsi Watifikazela kanjani Yena lucobo.

¹⁶⁸ Wehla. KwakunaLoti, entasi eSodoma, lilunga lelibandla lelisivvu, lelihlubukile hhafu. Futsi kwakukhona tiNgelosi letintsatfu letavela eZulwini, futsi tafika kucala ku-Abrahama, lobekamelele licembu lelibitelwe ngaphandle kuleyo Sodoma, leselivele libitelwe ngephandle.

¹⁶⁹ Futsi letimbili tetiNgelosi taya entasi eSodoma futsi tashumayela, atentanga imimangaliso leminengi kakhulu, Billy Graham wesimanje. Kodvwa watikhomba yena lucobo ayinceku yaNkulunkulu. Futsi masinyane emvakwekuba Loti sekaphumile, sivuvu sashiya lidolobha, wase-ke umlilo ubhubhisia indzawo.

Kodvwa caphelani kutsi hlobo luni lwaLoyo lowahlala na-Abrahama na? Caphelani.

¹⁷⁰ Manje, Abrahama bekaneminyaka lelikhulu budzala, naSara bekanemashumi layimfica. Iminyaka lengemashumi lamabili nesihlanu, bebasikholiwe lesosetsembiso sendvodzana letako, ibambelele kuso.

¹⁷¹ Uta lapho-ke Yena, kulabo labakholwako, abambelele kulesosetsembiso.

Futsi, bukisisani, laba lababili baya entasi.

¹⁷² Loyo Lowahlala na-Abrahama watikhomba Yena lucobo. Bekahleti Afulatsele lithende. Futsi khumbulani, bekakadze angu “Abram” kwate kwaba lusuku nje noma letimbili ngaphambi kwaloko, naSara bekangu S-a-r-a-y-i. Manje ungu S-a-r-a, futsi ungu A-b-r-a-h-a-m-a, Abrahama. Futsi Mcapheleni, Wambita (hhayi ligama lakhe lekucala) ligama

lakhe leliniketiwe, lusuku noma letimbili ngaphambili. “Abrahama, uphi umkakho, Sara?” S-a-r-a, inkhosatana.

Watsi, “Ulathendeni, emvakwaKho”.

¹⁷³ Manje, Bekafulatsele lithende. Futsi Watsi, “Abrahama, Mine, Ngitokuvakashela,” ngekwesetsembiso Lamantela sona. Niyabona kutsi BekanguBani na? Futsi Watsi, “Futsi Sara umkakho utoba naloluswane.”

¹⁷⁴ NaSara, asethendeni emvakwaKhe, liBhayibheli liyakhombisa, “Beka semvaKwakhe, ethendeni. Wahlekela ngekhatsi.”

¹⁷⁵ NeNgelosi yatsi, “Uhlekeleni Sara?” Niyabona na? “Uhlekeleni Sara na?” Ati kutsi bekentani ethendeni, ngemuva. Niyabona kutsi ngicondzze kutsini na?

¹⁷⁶ Futsi ngesikhatsi Abrahama aphuma, waMhola waphuma, Wahamba ngendlela yaKhe. Abrahama watsi wakhulumnaNkulunkulu, Elohim. Ini? Elohim, “Loyo Lowenele Konkhe.”

¹⁷⁷ Kwaku sibonakaliso sani na? Watsini Jesu na? “Njengoba kwakunjalo emihleni yaLoti, kuyoba njalo ekubuyenikweNdvodzana yemuntfu.” Loko, loko . . .

¹⁷⁸ Lomunye watsi kimi, “Mnaketfu Branham, awukholwa kutsi loyo kwaku nguNkulunkulu, uyakholwa na?” LiBhayibheli latsi kwaku nguNkulunkulu, futsi nguloko kuphela lengikwatiko. Watsi kwaku nguNkulunkulu.

¹⁷⁹ Kwaku sibonakaliso sani na? Kutsi, Nkulunkulu, etinsukwini tekugcina, ngaphambi kwekutsi umhlaba ubhujiswe, Uyobonakala ecenjini lelibitelwe ngephandle, Nkulunkulu atikhomba Yena lucobo enyameni yemuntfu emkhatsini webantfu baKhe. Nangu Yena, longuye itolo, namuhla, naphakadze.

¹⁸⁰ Manje, akusiwo umbuto wekutsi Utokuphilisa yini noma cha. Ngumbuto noma ngabe Uyaphila noma cha. Uma Aphila, Uyasigcina setsembiso saKhe. Uma kungesiyo, yindzaba leyinganekwane nje lesiyifundze ndzawanatsite, futsi nguloko kuphela lokukuko. Ngikholwa kutsi Uyaphila, kusihlwa, emkhatsini wetfu. Niyakukholwa loko na?

¹⁸¹ Anginalo liwashi. Angiboni . . . Liwashi lami lephukile, futsi a—angati kutsi sikhatsi sini. Ngako lomunye angitjele kutsi sesikhatsini. [Lomunye umfo utsi, “Alishumi nesihlanu kute kube nguyelishumi.”—Umhl.] Alishumi nesihlanu kute kube nguyelishumi. Nginefif. . . . Sengephute nje manje ngemizuzu lengemashumi lamane nesihlanu. Beningakacondzi kwenta loko. Ngiyacolisa. Ngitsetsele.

Asikhotsamise tinhloko tetfu umzuzwana nje.

¹⁸² Nginibuta umbuto. ImiBhalo, emaviki kusukela manje, besingahlala kulesosifundvo lesifanako. Kuyinkhomba kutsi

Jesu ulapha. "Banumzane, sitsandza kubona Jesu." Futsi, "Unguye itolo, namuhla, naphakadze." Uma bewu ngaMbona ahamba emkhatsini wetfu kusihlwa futsi ente tintfo letifanako nje khona lapha, loko Lakwenta ngesikhatsi Ahamba eGalile, bewu ngaMkholwa na? Uma bewungatsandza, phakamisa sandla sakho, utsi, "Bengingakholwa uma nje bengingaMbona enta intfo lefana naLayenta lapho."

¹⁸³ Babe wetfu loseZulwini, licembu lelitsandzeka kakhulu lebantfu. Bayakhombisa kutsi bayevisisa impela. Futsi ngi—ngi... Sijabula kakhulu, bafundisi, Nkhosi, kubona bantfu labasabela eVangelini. Kusho kutsi kune sibonakaliso, umsindvo wekuvunguta kwemoya emoyeni. Kungahle kube yintfo lesiyikhulekele, lapha eTucson, kubona imvuselelo lenkhulu.

¹⁸⁴ Silapha kutsi sitikhombe tsine lucobo njengetinceku taKho, njengafakazi weliciniso weliBhayibheli. Futsi siyati, kutsi, "Ekucaleni bekakhona Livi, naLivi beka kuNkulunkulu, naLivi beka nguNkulunkulu. NaLivi waba yinyama wakha emkhatsini wetfu." Futsi siyati kutsi leliBhayibheli livakalisa imicabango yaNkulunkulu kubantfu baKhe. NeLivi li "ngumcabango lovakaliwi." Nkhosi, kwangatsi kuzindla lokusenhlitiywensi yami, kutsi Wena "unguye itolo, namuhla, naphakadze," kwangatsi Moya loyiNgcwele angasita kusihlwa kuvakalisa leloLivi, kutsi litoba sitja lesiphilako emkhatsini wetfu ngco, kutsi sitobona kutsi Jesu uyaphila.

¹⁸⁵ Ngekwentanjalo, Nkhosi, ngikholwa kutsi tetsameli tebantfu titoMemukela. Labo laba ngakasindziswa bayofuna loyoMsindzisi lomangalisako. Kwati, kutsi, emvakweminyaka letinkhulungwane letimbili, nasi setsembiso saKhe, siphila nje kusihlwa njengoba sasinjalo ngaleli-awa Lasenta ngalo. Nalabagulako batophiliswa; labangcwele batobusiswa. Siyeva kutsi lemvuselelo lesiyikhulekelako itoba ngalendlela. Nkhosi, loku kukhweshe kangangoba noma ngumuphi umuntfu angahamba, kusho nje loko Lokushito.

¹⁸⁶ Manje sifuna Wena ute, Jesu lotsandzekako, futsi uvakalise kitsi kusihlwa Bukhona baKho, kute sonkhe sati kutsi Ulapha. Futsi kutojabulisa tinhliityo tetfu, Nkhosi, kwati, njengoba sehla ngesitaladi. Kuyosenta sonkhe sicabange, ngesikhatsi lesilandzelako sicala kwenta noma yini, noma sicabange tintfo lettingakalungi, siyati kutsi Uyasibukisisa. Siyati kutsi Ulapha. Siyati kutsi akunakwenteka nhlobo, Nkhosi, kutsi loku kwenteke ngaphandle kwaKho, ngako siyakhuleka kutsi Utosipha kona kusihlwa. EGameni laJesu. Amen.

¹⁸⁷ Manje, sikhapha emakhadi ekukhulekelwa nsuku tonkhe. Futsi manje, singeke sikhone kuwatsatsa onkhe kanyekanye. Futsi sesitsite kwephuta kancane. Ngi—ngikholwa kutsi sifanele kukuvala loku ngensimbi yelishumi ngco. Futsi sitobita emakhadi ekukhulekelwa lambalwa futsi sikhulekele labanye,

bantfu labagulako, futsi mhlawumbe Moya loyiNgcwele utopha lokutsite emkhatsini wetfu.

¹⁸⁸ Ngifuna wonkhe umuntfu ahlale athule ngalokuphelele. Thulani, nithule nje ngako konkhe leningakwenta. Bamba indzawo yakho. Bese-ke, khumbula, khuleka.

¹⁸⁹ Manje, ake sibone, sicala nje nomakuphi nje. Billy undzawanatsite lapha, uma nje ngingabona lapho akhona. Uniketa emakhadi ekukhulekelwa. Angati kutsi unikete ini. O, usemuva esitfuntini, emuva lapho. Ini? A, kusukela kulekucala kuya ekhulwini. Kulungile. Akutsi labasiphohlongo noma lishumi basukume.

¹⁹⁰ A, wekucala, ngubani lonelikhadi lekukhulekelwa A, wekucala na? Uma ungakhoni kusukuma, ngani, sitokutfwala. Sitobona kutsi wena... A, wekucala? Ake sibone, nguyiphi indlela na? Kuncono ute *ngalapha*, ngiyacabanga. Noma, *ngalapha*? Kulungile. A, wekucala, ungahamba uye lapho ngco, dzadze. Labanye...

¹⁹¹ A, lesibili? Ngubani lonakubili, lesibili? Ngiyati kutsi bantfu baseSpeyini lapha. Lesibili, unga siphakamisa sandla sakho kute sibone kutsi ukuphi na? A, wesibili. Umnumzane lohloniphekile emuva lapho. Ungeta lapha, mnumzane.

¹⁹² Wesitsatfu, wesitsatfu, ubambe likhadi lekukhulekelwa lesitsatfu, ungasiphakamisa sandla sakho na? Dzadze. Ungeta *ngalapha* ngco, dzadze, uma utsandza, wesitsatfu.

¹⁹³ Lesine, ngubani lonelikhadi lekukhulekelwa lesine na? Ungasiphakamisa sandla sakho etulu lapho na? Lomnumzane lohloniphekile lapha, khona lapha. Kulungile.

Lesihlanu? Kulungile, *ngalapha*.

Lesitfupha, ngubani lonelikhadi lekukhulekelwa lesitfupha, lesitfupha?

¹⁹⁴ Lomunye uyakusho ngelulwimi lwase Speyini. Ini? [Lomunye umfo utsi, “Seis.”—Umhl.] Seis? [“Seis.”] Seis. Likhadi lekukhulekelwa lesitfupha. Ngiyetsema... Niyabona na?

¹⁹⁵ Buka likhadi lekukhulekelwa lamakhelwane wakho. Kungahle kube ngumuntfu losihhulu. Abakhoni kukuva, uyabona. Bebatogejwa littuba labo. Sifuna wonkhe umuntfu akhulekelwe. Ngako manje bonani uma noma ngubani, ubambe likhadi lekukhulekelwa, kulungile, lesitfupha. Bangahle...

¹⁹⁶ Kunalabanye labasele lapha, emizuzwaneni lembalwa leyendlulile, ngako kungahle kube kutsi ngishumayele sikhatsi lesidze kakhulu, noma ngikhulume sikhatsi lesidze kakhulu, njalo. Noma, angizange ngishumayele, kodvwa ba—bangahle kube bakhandlekile.

¹⁹⁷ Sitfupha, sikhombisa. Sikhombisa, ungasiphakamisa sandla sakho na? Sikhombisa. Siphohlongo, imfica. Kunjalo. Kuhle.

Lemfica, lemifica, lemifica, likhadi lekukhulekelwa lemifica na? Ngabe ngumfanyana na? Unalo likhadi lekukhulekelwa lemifica, ndvodzana na? Siphohlongo. Kulungile. Loko kukahle. lesiphohlongo, imfica?

¹⁹⁸ Manje, uma utfola emakhadi ekukhulekelwa, buka, unga—unga—ungawatsatsi nje, uyabona, futsi—futsi ungenyuki, ngoba ugebenge umuntfu tsite waleyondzawo, niyabona. Futsi wena, ufanele ute bese utsatsa likhadi lakho lekukhulekelwa. Niyabona, lomunye umuntfu uyafika bese utfola linye, alinike lomunye umuntfu, bese bayasukuma baphume, bese-ke, niyabona, lomunye umuntfu uayigeja leyondzawo lapho umuntfu bekangangena khona. Kulungile.

¹⁹⁹ Kunelesitfupha nelemfica lelingekho. Ngubani longakusho ngelulwimi lweSpeyini, amemete kakhulu na? [Lomunye utsi, “Nueve.”—Umhl.] Kulungile. Noma ngabe bekuyini leyo, kulungile, loko kuhle. Kulungile. Uma lelokhadhi lekukhulekelwa lilapha, kulungile.

²⁰⁰ Ngabe loyodzadze unalelo, sitfupha noma imfica na? Wena, sitfupha? Kuhle. Kulungile.

²⁰¹ Imfica, manje, ngubani lonelikhadi lekukhulekelwa lemifica na? [Lomunye utsi, “Bahambile.”—Umhl.] Bahambile. Kulungile. Kulungile.

²⁰² Asicale lapha, ke. Kulungile, sicale lilayini lala bakhulekelwako, futsi sicale.

²⁰³ Manje, bese-ke, si—siyajakwa kancanyana, ngako ningabi neluvalo manje. Sitophuma cishe kuyelishumi, imizuzu lelishumi nesihlanu. Kodvwa ngifuna kunibuta lokutsite.

²⁰⁴ Nguloko-ke, bazalwane. Manje ngifisa kwangatsi beningakwenta, indzawo lencane nje lapho, uma ni—uma nitsandza. Ngiyabonga.

²⁰⁵ [Lomunye umfo utsi, “Mnaketfu Branham, asidzingi kuphuma lapha ngensimbi yelishumi. Tsatsa sikhatsi sakho.”—Umhl.] Lomnaketfu usandza kufika nje, wangitjela, sasingadzingeki kutsi siphume ngensimbi yelishumi. Ngako, loko kuhle. Yebo-ke, asifuni kukhatsata bantfu.

²⁰⁶ Nayi i—nayi intfo. Ngekubona kwami... Manje, bangakhi khona lapho longenawo emakhadi ekukhulekelwa, kepha noko uyagula na? Phakamisa sandla sakho, nite emakhadi ekukhulekelwa. O, sekuphelile nje. Awudzingi kutsi ube nelikhadi lekukhulekelwa. Ufanele ube nekukholwa. Niyabona na? Likhadi lekukhulekelwa yintfo letsite nje loyiphetse ngesandla sakho. Niyabona na? Wena... Likhadi nje lelinenombolo kulo. Nguloko kuphela lokukhona, likhadi lelinenombolo yekucala, yesibili, yesitsatfu, noma ngabe kuyini. Futsi ngaletinye tikhatsi si... Lusuku ngalunye sikhipha

emakhadi lamasha, ngoba kunebantfu labangenako. Bese-ke sicala endzaweni yinye, nalenye. Impela.

²⁰⁷ Bangakhi lowake waba kulomunye wemihlangano ngaphambili na? Ake sibone sandla sakho. O, o, bengicabanga kutsi bengikhona ngaphambi kwetetsameli letingakejwayeleki, bese-ke ngikhuluma ngentfo lenjengaleyo. Niyabona na? Ngani, cha. Kukhona lokubili kulokutsatfu ekhatsi lapha labake baba semihlanganweni ngaphambili. Kulungile. Niyacondza kutsini, indlela lesenta ngayo.

²⁰⁸ Manje, angimboni umuntfu kulesikhatsi lesi lebengingasho kutsi ngiyamati. Ngi—ngingahle ngati labanye benu, kodvwa akekho lengimbonako lengimatiko. Angiboni ngisho namunye umuntfu.

²⁰⁹ Ngi—ngiyati umkami usekhatsi lapha ndzawanatsite, nalenye yemadvodzakati ami, kodvwa, futsi, kodvwa angati kutsi ukuphi, ngisho. Usekhatsi lapha ndzawanatsite. Kodvwa a—angi...

²¹⁰ Futsi ngiyati kutsi ngimvile uMnaketfu Fred Sothmann, lomunye wemagonsa etfu elibandla e-Indiana, utsi, “Amen,” esikhashaneni lesendlulile. Kodvwa Babe waMi loseZulwini uyati kutsi angikhoni ngisho kubona lendvodza. Kutsi kuba lukhuni kubona kusuka lapha. Angati ngisho nekutsi ukuphi.

Angiboni namunye lengimatiko, namunye wenu.

²¹¹ Kodvwa, futsi nonkhe kulelilayini lalabakhulekelwako, nine leniselayinini lalabakhulekelwako, nonkhe longangati, noma uyati kutsi angikwati, phakamisa sandla sakho, lowatiko. Kulungile. Lonkhe licembu labo. Angibati. Abangati. Aningati mine, futsi angikwati.

²¹² Manje, intfo yako ikutsi manje, ngabe Jesu Khristu uyaphila? Nguloko lesifuna kukwati. Niyabona na? Futsi manje singeke ngisho...Tinengi tintfo lebesingatisho. “Yebo, ngiyaMuva enhlitiywени yami.”

²¹³ Bantfu batsi, “Lenye intfo.” Futsi basho tintfo letinengi. Batsi, “Leyo yisayensi yengcondvo.”

²¹⁴ Kodvwa sifuna kwati, ngabe Uyaphila ngekwelisiniso yini, ngekwemBhalo utikhomba Yena lucobo longuye itolo, namuhla, naphakadze na? Nguloko lesifuna kukwati.

²¹⁵ Manje, nali Livi laNkulunkulu, futsi ngiLiphetse ngesandla sami. Akukho muntfu lengingambona, ngaphandle kwendvodzana yami manje.

²¹⁶ NeMnaketfu Tony lohleti phansi lapha, kodvwa umengameli weFull Gospel Business Men’s Fellowship, ngulabantfu lababili kuphela lengibabonako, lengibatiko.

²¹⁷ Bahlabeli labancane bahleti ngephandle lapho ekugcineni, ngi—ngicabanga kutsi bakahle kakhulu. Ngikholwa kutsi

lona ngumake wabo lohleti khona lapha. Anginasiciniseko. Noma—noma, ngabe kunjalo na? Ngabe ngineliphutsa kuko na? Yebo—ke, ngineliphutsa lapho. Ngako, a—angati. Ngibone dzadze adlala. Ngabe nguye lona kulepiyano na? Yebo—ke, ngibone dzadze, ngalolobunye busuku, adlala enhla lapho, lobekabukeka kakhulu njengalona dzadze lapha, lengicabange kutsi kwakungu—ngumake. We—we...Nango ke. Yebo, mnumzane. Kunjalo. Yebo—ke, manje, utofanele utsi, babukeka bafana kakhulu impela. Kunjalo. Kodvwa, loko, niyabona, bengingamati ngisho naloyodzadze.

²¹⁸ Manje, ngako—ke, ngime lapha nebafundisi bangitungeletile, emvakwami, nangephandle ngaphambili, bantfu laba ngemaKhristu. Futsi naku sime lapha. Futsi ngitisho kutsi bufakazi beliBhayibheli baJesu Khristu busibonakaliso sesiprofetho. LiBhayibheli lisho njalo. Futsi Unguye itolo, namuhla, naphakadze. Futsi wetsembisa kutsi, uma besitokholwa nguYe, lemisebenti Layenta natsi besiyoyenta. Manje, ngabe liciniso lelo na?

²¹⁹ Manje, uma lelo kuliciniso, sonkhe soni sifanele sititfole lapha e-altari, indzawo lapha, futsi ucele kutsetselelwa kwesono. Wonkhe umuntfu logulako ufanele wemukele kophiliswa kwakho khona lapho ukhona.

²²⁰ Ngoba, kute emandla kimi. Ngingumunfu. Nangu umfundisi wakho, uyafana nje njengami. Sitinceku taKhristu nje. Kodvwa, silapha. Manje, baba—babashumayeli. Angisuye umshumayeli kangako. Niyakwati loko, njengamanje. Kodvwa ngi—ngi...Babafundisi, bothishela, nakanjalonjalo. Angisuye umfundisi, noma umshumayeli, njalo, ngoba anginamfundvo, noma, futsi anginako kufundza kwasesikolweni. Futsi anginato tico te...futsi naloko...Cha B.A. noma bo D.D, noma...A—anginako nje. Futsi ngi—ngi—ngi...Kodvwa iNkhosi yanginika si—siphiwo, ngoba ngiyaYitsandza. Futsi I—Ingivumela ngiMsebentele ngalendlela.

²²¹ Futsi uma Atotibonakalisa Yena lucobo lapha; kutsi Ulapha; futsi wona kanye loMoya loyiNgewelete lomemukelako, uyafakaza kutsi nguYe. IPhentekhosti nguyonantfo kuphela letofakazela buKhristu. Ungeke wakufakazela ngesayensi. Ungeke wakufakazela ngalutfo ngaphandle kwesentakalo sephentekhostali. Nine maBaptisti niyakwati loko, nani maMethodisti nemaPresbyterian, nanoma yini leningyo.

Niyati kubita lwati lwephentekhostali kufakazela Nkulunkulu. Futsi loko kukumunfu ngamunye. Akuyifikazeli inhlangano. Kufakazela umunfu ngamunye.

²²² Njengoba Jesu atsi kuPhetro, ngesikhatsi atsi, “Wena unguKhristu, iNdvodzana yaNkulunkulu.” Watsi, “Inyama nengati akukakwembuleli loku, kodvwa nguBabe waMi loseZulwini. Etikwalelidvwala Ngitawulakha liBandla laMi,

nemasango esihogo angeke aze alidzilite, niyabona, angeke alehlule.”

Manje, kukuphi na? Lodzadze.

²²³ Manje, uma Jesu Khristu afakazela kutsi Uyaphila, bangakhi lotokwemukela kophiliswa kwakho, khona lapho uhleti khona na? Phakamisa sandla sakho nje, utsi, “Uma Atokwenta nje loko Lakwenta lapha, ngiyati kutsi Uyaphila. Mnaketfu Branham, ngi—ngikuvile ukhuluma. Ngiyakwati. Ungumshumayeli lomncane lonemphandla nje lome lapho, niyabona, futsi ngiyati akukho lutfo kuwe. Kodvwa ngi—ngiyati, uma ukhulume liCiniso, Nkulunkulu impela uyofakaza ngaLo. Ubophelelekile kwenta loko.”

²²⁴ Manje, ngikhulume ngaYe. Manje Akakhulume, kutsi nginitjele liCiniso. Uma kungesilo liCiniso, khona-ke akusilo liCiniso. Uma LiliCiniso, khona-ke Uyalemukela.

²²⁵ Lodzadze lapha, angikaze ngimbone. Uphakamise tandla takhe, emizuzwini lembalwa leyendlulile, kutsi sitihambi lomunye kulomunye. Angahle kube weva ngami ndzawanatsite, ephepheni, liphephabhuku, noma angahle kube ungibonile emhlanganweni. Kodvwa ngekwati noma yini ngewesifazane, kwekucala, intfo kuphela lengiyatiko, mhlawumbe angikaze ngihlangane naye ngaphambilini emphilweni. Ume lapha, usihambi ngalokuphelele.

²²⁶ Ake nisho, loku kwenteka kube yintfo lengikhulume ngayo, emizuzwaneni lembalwa leyendlulile. Nangu wesilisa newesifazane, babonana kwekucala, njengaJohane loNgewe sahluko se 4, ngesikhatsi iNkhosi yetfu Jesu Khristu ihlangana nalowesifazane emtfonjeni. Khona ngco endzaweni leyimboniso, indlela lefanako, njengoba liBhayibheli nje lakufanekisa futsi. Jesu akazange amati. Akazange amati Jesu. WaMbuta, acela yena, futsi—futsi Wamcela emanti ekunatsa. Kwase kutsi-ke ngesikhatsi Babe embula kuYe kwakuyini inkhatsato yakhe, ngekushesha wacondza kutsi loko kwakungetulu kwemuntfu lojwayelekile nje.

²²⁷ Manje, dzadze, a—angikwati, angati ngisho nayinye info ngawe. Kodvwa ngikhulume nawe nje, noma wena ungumuntfu wekucala kubamba uMoya weNkhosi. Futsi manje ngiyabona kutsi ulikholwa, futsi ngicondze likholwa lelingumKhristu, hhayi locela kugitjeliswa. Ngoba, masinyane, ngesikhatsi ngijikela kuwe, umoya wakho uzizizitela kwemukeleka. Niyabona, ngiyati kutsi ungumKhristu. Niyabona na? Manje, bekangaba ngumzenzisi; bekangaba ngunoma yini; bekangaba ngumkholisi eme lapho. Ngingati kanjani na? Angikaze ngimbone emphilweni yami.

²²⁸ Kodvwa, manje, uma—uma loku kutiphindza, kutsi Uyati kutsi inkhatsato yakho ikuphi, Uyati kutsi ute ngani lapha. Kungahle kube kugula. Kungahle kube yinkhatsato yetetimali.

Kungahle kube yinkhatsato yetasekhaya. Angati. Uyati. Kodvwa uma Atokwembula kimi ngeBukhona baKhe, futsi avumele ingcondvo yami netindzebe, nako konkhe, kuchutjwe kakhulu nguYe, aze Akutjele kutsi uteleni lapha. Uyati kutsi kuliciniso yini noma cha, ungeke na? Bewungakwati, noma ngabe kwakuliciniso noma cha.

Bangakhi labatokukholwa na? Niyabona na?

²²⁹ Manje, ngilapha, netandla tami tiphakeme, nami. Angikaze ngimbone emphilweni yami, ngekwati kwami. Angikaze ngimbone emphilweni yami. Sitihambi ngalokuphelele, lomunye kulomunye. Manje, uma Moya loyiNgcwele angembula, kulona wesifazane, intfo letsite ngaye: intfo letsite layentile, njengoba kwenta loyo wesifazane emtfonjeni ngalesosikhatsi; noma intfo lebekafanele ayente, futsi akayentanga; inkhatsato letsite lebekanayo; intfo lesenhlitiywani yakhe; intfo layifunako, noma intfo lefana naleyo; kutofanele kuvele eMandleni langetulu kwemvelo. Bangakhi lokwatiko loko na?

²³⁰ Yebo-ke, manje, bewungatsatsa luhlangotsi lwebaFarisi, bese utsi, "Ngudeveli." Noma, bewungatsatsa luhlangotsi lwelikhholwa, bese utsi, "NguNkulunkulu." Khona-ke, kuncike kuwe. Kukuwe.

Manje, loko, kwangatsi Moya loyiNgcwele angakhulum.

²³¹ Manje, uma nine lenilawula lemibhobho, ngalesinye sikhatsi uma luGcobo lwehla, kutsi a—angati kutsi ngikhulumaka kakhulu kangakanani.

²³² Niyabona lapho ngifanele ngime khona manje? Kusemkhatsini wekutsi ngifanele ngime naleLivi...Futsi ngimemetele kutsi LiliCiniso. Manje ngifanele ngetsembele kuNkulunkulu ngimemetela loko emuva, kutsi kuliCiniso, khona lapha embikwalabantfu laba.

²³³ Ngakwenta phambi kwencenyе yesigidzi. Nkulunkulu wakwenta, njalo, ake ngisho, eBombay, eNdiya, embikwe tinkhulungwane letingemakhulu lamabili nemashumi lasihlanu.

²³⁴ ENingizimu Africa, emzileni wemjako, ngesikhatsi bemdzabu betingubo labatinkhulungwane letingemashumi lamatsatfu bemukela Khristu. Netinkhulungwane letingemashumi lamabili nesihlanu, tilele etinhlakeni nayo yonkhe intfo, tasukuma tase tiyesuka tiyahamba, ngesikhatsi lesifanako. Loko kwaku—loko kwaku bakhonti betithico.

²³⁵ Bekufanele kwenteni ecenjini lelitelwe kabusha lelikholwa nguNkulunkulu futsi lifuna intfo lenjengaleyo kutsi yenteke na? Imimangaliso letinkhulungwane letingemashumi lamabili nesihlanu yentiwa ngesikhatsi sinye nje, nguloko kuphela lebebefuna kukubona, masinyane nje uma kwenteka. Bekufanele kwenteni kitsi na?

²³⁶ Manje, dzadzewetfu, sibantfu lababili, labatalwa etincenyeni letehlukene telive, mhlawumbe, futsi kuhlangana kwekucala kwetfu lapha manje. Futsi ngi—ngifuna kuhulumana nani nje, kute, uma Atokwembula kimi, njengoba sonkhe silindzele kubona kutsi kwentekani. Manje, kufanele kube nguYe, ngoba a—angikwati. Angikaze ngikubone, kodvwa Nkulunkulu uyakwati.

²³⁷ Kodvwa manje uma libandla... Ngubani loke wakubona loko kuKhanya, lesositfombe seNgelosi yeNkhosi na? Bangakhi loke waKubona na? Niyabona na? Kulungile. NaKu, khona lapha emkhatsini wami nalowesifazane, khona manje. Anikuboni Loko na? Kuya kuye. Niyakubona na? Niyabona na? Lowesifazane uyaBuka, cobo lwakhe.

²³⁸ Lowesifazane unetifo letelakanyanako. Unetintfo letinengi lettingakalungi kuye. Lenye yetintfo letinkhulu lengalungi kuye simo senyongo. Liciniso lelo. Manje, uma loko kunjalo, phakamisa sandla sakho.

²³⁹ Manje niyakholwa na? Futsi Unguye itolo, namuhla, naphakadze. Akasuye na? Niyakukholwa loko, bazalwane na?

²⁴⁰ Bengisolo ngiva loko kufika, lomunye watsi, “Ukucombelele loko.” Angikucombelelanga loko. Futsi, niyabona, ungeke utifihle manje. Moya loyiNgcwele ulapha. Lokucabangako, ngitokubamba. Jesu wayibona imicabango yabo, niyabona. Futsi angisuye Jesu, kodvwa Ulapha natsi. Niyabona na?

²⁴¹ Lapha, angikwati. NaJesu utongitjela kutsi ungubani, khona-ke loko bekufanele kukhiphe lombuto kuko, ngasosonkhe sikhatsi. Bekungeke na? Nkkt. Heineman, chubeka ngendlela yakho. Sewuphilisiwe. Jesu Khristu uyakusindzisa. Amen.

Seniyakholwa manje? Wena utsi, “Lelogama laloyo wesifazane?”

²⁴² Ngani, Akamtjelanga yini Simoni kutsi bekangubani ligama lakhe, kutsi bekangubani uyise na? Unguye itolo, namuhla, naphakadze. Niyakukholwa na?

²⁴³ Sawubona, mnumzane? Nayi indvodza lengingakaze ngiyibone emphilweni yami. Ngicabanga kutsi sitihambi, lomunye nalomunye. Kunjalo. Kute bantfu bat, phakamisa sandla sakho nje kute bantfu babone kutsi sitihambi. Angikaze ngiyibone lendvodza. Ibuuka kwangatsi be—beyiphile ngalokwenele. Angiyati lendvodza. Angikaze ngimbone. Nkulunkulu wati konkhe ngaye.

²⁴⁴ Manje, kube bekagula futsi bengingamphilisa, bengingeke yini ngibe ngumuntfu lomubi kabi kube benginga kamphilisi na?

²⁴⁵ Kodvwa angikhonanga kumphilisa, ngoba ngingeke ngente loko Khristu lasavele akwentile. Sewuvele upholisiwe, uma agula. Kuyintfo nje letsite ku... Kube Jesu bekeme khona lapha

afake lesudu, Langipha yona, Bekangeke akuphilise. Utokutjela kutsi Sewuvele ukwentile. Walinyatwa ngenca yetiphambeko tetfu, ngemivimba yaKhe. Utokubuta kutsi uyakukholwa yini.

²⁴⁶ Kodvwa Bekangatikhomba Yena lucobo kutsi Unguye itolo, namuhla, naphakadze, futsi nguloko nje Lakwentako. Niyabona na? Kunjalo.

²⁴⁷ Manje, nayi lendvodza. Lomunye kwaku nguvesifazane. Angikaze ngimbone, ngihlangene naye. Sitihambi nje lapha emhlaben. Manje, mnumzane, uma Moya loyiNgcwele lomkhulu...

²⁴⁸ Lokukutsi, unekuva khona manje, kukhona lokwenteka ngaso lesosikhatsi. Akuzange na? Manje, loko kuKhanya kwahlala ngco etikwalendvodza. Mbute nje. Ngifuna nati loku. Umzuzwana nje lowendlulile, kuva lokumnandzi sibili lokutfobekile kufika etikwakho. Ngabe kunjalo na? Phakamisa sandla sakho uma loko kunjalo. Uyabona na? Ngibuke Kuko ngco, uyabona, lapho. Kulungile.

²⁴⁹ Lendvodza itsi kuba luhunyana kancane kuva etindlebeni tayo, kodywa inalokutsite lokumatima lokwenteka kuyo. Ube nekuhlindvwa kwalakudzabuke khona inyama. Nguloko lofuna ngikukhulekele. Uma loko kunjalo, phakamisa sandla sakho. Kulungile.

²⁵⁰ Ngabe kunjalo na? Niyakukholwa loko na?

Manje, niyabona, awuticcombelei leto tintfo. Tiliciniso.

²⁵¹ Lapha, unalokutsite enhlitiyweni yakhe, ufunu kukholwa kutsi nguNkulunkulu yini noma cha. Kunalenye intfo enhlitiyweni yakho, intfo loyifunako. Ukhona lomunye ngephandle lapha etetsamelini, lohlaselekile, naye. Ngumkakho. Kunjalo. Unetifo letelakanyanako, elusizini nebuhsungu, khona manje. Akunjalo loko na? [Lodzadze utsi, “Yebo.”—Umhl.] Kulungile, dzadze, sewuphisiwe, nawe. Nobabili hambani niye ekhaya. Jesu Khristu uyakusindzisa. Chubeka ngendlela yakho, utfokota. Akabongwe Nkulunkulu. Welulame. Akabusise!

²⁵² Kholwa manje. Bani nekukholwa. Ungangabati. Kholwa. Konkhe kungenteka kulabo labakholwako. Niyabona na? Ngingeke sengiphilise. Angisuye umphilisi. Kodvwa Jesu Khristu uyatifikazela Yena lucobo kutsi Ulapha nawe.

²⁵³ Loku, luhlobo lweliNdiya noma dzadze waseMexico longibukako, khona lapha, uphetfwе ngumfutfo wengati lophakeme. Uyamkholwa Jesu Khristu na? Angikwati. Angikaze ngikubone. Ngabe kunjalo na? Kodywa, bewuhleti lapho, bewukukholwa loko. Bekungesiwe na? Sukuma ume netinyawo takho, uma loko kunjalo, uma uhlushwa ngumfutfo wengati lophakeme. Jesu Khristu ukuphilisile.

²⁵⁴ Kwentekani lapho na? Wena utsi, “Mnaketfu Branham, loyo akusiwo umBhalo.” Yebo, ngiwo. Wesifazane watsintsa sembatfo saKhe. Ngabe kunjalo na?

²⁵⁵ Manje, bangakhi kini bafundisi nani nine bantfu lenikukholwako loku, kutsi liBhayibheli liyasho, kutsi, “Manje unguPhristi loMkhulu lonekuvelana nebutaksaka betfu na?” Ngabe kunjalo na? Ungati kanjani kutsi uMtsintsile na? Ngoba Wenta ngendlela lefanako Lenta ngayo itolo. Amen. KuMenta abe nguye itolo, namuhla, naphakadze.

Loyo wesifazane lomncane tatane ahleti lapho, niyabona, kukholwa kwakhe!

²⁵⁶ Kwakukhona wesifazane ngalesinye sikhatsi wendlula esicukwini sebantfu, futsi watsintsa sembatfo saKhe, ngoba watsi ngekhatsi kuye lucobo, “Ngikholwa kutsi leNdvodza ineliciniso. Ngikholwa kutsi UyiNdvodzana yaNkulunkulu. Futsi uma nje ngingatsinta umphetfo wesembatfo saKhe, ngitophiliswa, ngisindze.” Bangakhi loyatiko lendzaba na? Yebo-ke, khona-ke, uma A . . .

²⁵⁷ LiBhayibheli litsi, eThestamentini leLisha, incwadzi yemaHebheru, kutsi, “UngumPhristi loMkhulu khona manje lonekuvelana nebutaksaka betfu.” Sati kanjani kutsi siMtsintsile na? Ngoba Wenta ngendlela lefanako Lenta ngayo itolo.

²⁵⁸ Manje, niyati lowesifazane akazange angitsintse. Ukhweshe ngemafidi langemashumi lamatsatfu kimi.

²⁵⁹ Kodvwa watsintsa loyomPhristi loMkhulu lesichumene naye. Nako laph’ukhona. Ngamunye wenu angakwenta loko uma nje utokholwa. Amen. Niyabona kutsi Uyafana na?

²⁶⁰ Manje buta lowesifazane lomncane. Angizange sengimbone, angizange sengimati. Unguwesifazane nje lohleti lapho.

²⁶¹ Ngiyacolisa. Sitihambi, lomunye kulomunye, kodywa Jesu Khristu usati sobabili. Uyakholwa kutsi Angembula kimi intfo loyentile, intfo loyifisako na? Bekungakwenta ukwati loko na? Mine, umnakenu nje, bengingeke ngikwati loko. Kutofanele kuvele emandleni latsite. Ungakukholwa kutsi nguJesu Khristu na? [Lodzadze utsi, “Yebo.”—Umhl.] Utokwenta. Ngikholwa kutsi bewungakwenta, ngoba unguKhristu. Kulungile. Wena, uyangikholwa manje.

²⁶² Futsi manje tetsameli titokholwa ngayo yonkhe inhlitiyo yato na? [Libandla litsi, “Amen.”—Umhl.] Uyakholwa kutsi leli-awa lesiphila kulo, kutsi letintfo leti tifanele tifike khona manje? [“Amen.”] Khumbulani, leso kwakusibonakaliso sekugcina Israyeli lebekanaso ngaphambi kwekutsi a . . . “Lokwatsatfwa, kwatsatfwa. Lokwashiywa, kwashiywa.” Leso kwakusibonakaliso sekugcina ngaphambi nje kwekutsi kwehle umlilo. Ngabe kunjalo na?

²⁶³ Sibe netibonakaliso, timanga, kungcweliswa, umbhabhatiso waMoya loNgcwele, kukhuluma ngetilimi, kuphilisa kwaNkulunkulu. Kodvwa kwakuyini sibonakaliso sekugcina ngaphambi kwekutsi iSodoma ishiswe na? Yona kanye lentfo leniyibonako kusihlwa, Nkulunkulu atibonakalisa Yena lucobo enyameni yemuntfu, ati imfhilo yenhlitiyo. Jesu Khristu washo njalo. “Njengoba kwakunjalo emihleni yaseSodoma, kuyoba njalo ekubuyeni kweNdvodzana yemuntfu.”

²⁶⁴ “Awusho, ubuka lowesifazane. Ufundza ingcondvo yakhe.” Ngitomfulatsela ke. Niyabona na? Ningacabangi kutsi angikubambi lenikucabangako, ngoba ngingiko. Kulungile.

²⁶⁵ Dzadze, yenyukela lapha nje manje, ngako ngitobuka etulu futsi ngingabambi lomunye umuntfu. Manje, sitihambi ngalokuphelele. Kodvwa uma Jesu Khristu angembula kimi kutsi iyini inkhatsato yakho, utokukholwa na? Uma utsandza, phakamisa sandla sakho.

²⁶⁶ Ngiyabona unekwetfuka lokukhulu. Kunjalo. Futsi ikakhulukati loko kwenteka ngesikhatsi sasentsambama kakhulu, uma ukhatsala futsi ukhandlekile, yonkhe intfo ibonakala kwangatsi ayikejwayeleki kuwe. Uphetfwe futsi sifo sekucacamba kwematsambo. Uma loko kunjalo, jikitisa sandla sakho. Ya. Futsi ngiyacaphela kutsi uma u—uma utama kuvuka embhedzeni, uhamba kancane impela, uma uvuka ekuseni. Kutsi kabalukhuni kuwe ngalesosikhatsi. Liciniso lelo.

²⁶⁷ Intfo lengakejwayeleki. Ngibona indvodza, insizwa, ibonakala ekhatsi lapha. Yindvodzana yakho, futsi iphetfwe simo sengcondvo. Nesimo sengcondvo sabangelwa yinkhatsato yasekhaya. Loyo ngu ISHO KANJE INKHOSI. Liciniso lelo. Akunjalo na? Uyakholwa manje na? [Lodzadze utsi, “Yebo.”—Umhl.] Khona-ke hamba ukutfole ngendlela lokholwa ngayo. Nkulunkulu abe nawe. Bani nekukholwa, futsi ukholwe. Kutolunga.

²⁶⁸ Uyakholwa ngayo yonkhe inhlitiyo yakho na? Impela. Wati konkhe ngawe.

²⁶⁹ Sawubona, mnumzane? Sitihambi lomunye kulomunye, ngiyacabanga. [Lomnaketfu utsi, “Yebo, mnumzane.”—Umhl.] INkhosi Jesu iyasati sobabili. Singemadvodza lamabili lahlangana lapha kwekucala emphilweni. Kodvwa ukhona Lomunye lapha. Unga...

²⁷⁰ Kuchachatela, lobo nje butsakatsaka, niyabona. Ngakhuluma li-awa noma ngetulu; akungilimati. Kodvwa umbono munye nje, lokwentako. Niyabona na? Niyabona na? Bangakhi lotivako kutsi uyakucondza loko na? Danyela wabona umbono munye, wakhatsateka enhloko yakhe tinsuku letinengi. Jesu washumayela busuku bonkhe nayo yonkhe intfo, kodvwa wesifazane munye lomncane watsintsia sembatfo saKhe futsi Watsi, “Ngiyabona kutsi emandla aphumile kiMi.”

Ngabe kunjalo na? Loko ngemandla. Futsi bekungenta loko eNdvodzaneni yaNkulunkulu, bekungentani kimi, soni na? Niyabona na? Niyabona na? Kwenta lokutsite kini. Ecinisweni, tonkhe tetsameli manje setiba nje lufifi. Niyabona na?

²⁷¹ Angikwati, kodvwa Nkulunkulu uyakwati. Kodvwa uma Atokwembula kimi lokusenhlitiyeni yakho, khona-ke U... Jesu wayibona yona impela imicabango yabo. Niyabona na? Uyayati inhlitiyo yakho. Futsi uma Angembula kuwe tifiso takho, ungakholwa kutsi utokwemukela na? [Lomnaketfu utsi, "Amen."—Umhl.]

²⁷² Bangakhi khona lapho lebebangakhola kutsi beningakwemukela na? Loko kufanele kukucatulule, uma ukukholwa.

²⁷³ Intfo letsite emkhonweni wakho ikhombisa kutsi unemfutfo wengati lophakeme. Kunjalo. Kodwa kunembangela, nalembangela isukela esifeni sekuvuvuka kwemphimbo. Kunjalo. Uyangikhola kutsi ngingumprofethi waKhe, noma inceku yaKhe, njalo na? [Lomnaketfu utsi, "Yebo, mnumzane. Ngiyakhola."—Umhl.] Uyakhola kutsi Uyakwati na? ["Amen."] Ufuna kophiliswa ngenca yesizatfu lesihle. Ufuna kuba sittfunywa senkholo. Sikhala sakho semsebenti sitobase-Central America. Ngabe kunjalo na? Mnumz. Ogum, kholwa ngayo yonkhe, kholwa ngayo yonkhe inhlitiyo yakho. Hamba futsi wemukele kophiliswa kwakho. Jesu Khristu utokusindzisa.

²⁷⁴ Uyakhola na? Bangakhi lokholwako kutsi Jesu unguye itolo, namuhla, naphakadze na? Uyakhola kutsi Ulapha na?

²⁷⁵ Manje ake ngininike lomunye umBhalo. Jesu watsi, "Hambani niye eveni lonkhe futsi nishumayele liVangeli kuko konkhe lokudaliwe. Loyo lokholwako futsi abhabhatiswe ujosindziswa; loyo longakhola uyolahlw. Letibonakaliso leti tiyobalandzela labakholwako." Ngabe kunjalo na? "NgeliGama laMi bayokhipha emadimoni. Bayokhuluma ngetilimi letinsha. Uma baphatsa tinyoka noma banatse lokubulalako, angeke kubalimate. Uma babeka tandla tabo etikwalabagulako, bayosindza." Bangakhi labatiko kutsi loko kuliciniso na?

²⁷⁶ Bekayini emavi aKhe ekugcina lawa etindzebeni taKhe lapho Akhushulwa na? "Uma babeka tandla tabo etikwalabagulako, bayosindza." Ngabe kunjalo na? Niyakukholwa na? Mangakhi emakholwa lasekhatsi lapha na? Ake sibone. Kulungile.

²⁷⁷ Manje, uma nifuna kubona ummangaliso waNkulunkulu, kholwani kutsi loku lenginitjela kona, futsi niyabona kubonakaliswa, nguJesu Khristu. Bese-ke nibeka tandla tenu etikwalomunye nalomunye. Bekani nje tandla tenu etikwalomunye nalomunye. Akunandzaba kutsi yini lengalungi, bekani nje tandla tenu etikwalomunye losedvute nawe.

²⁷⁸ Manje, niyabona, akusiko kwami nje. Nguwe. “Letibonakaliso leti,” akashongo kutsi, “titolandzela William Branham nje.” Kwatsi, “Bayobalandzela *labo* labakholwako, uma *babeka* tandla *tabo* etikwalabagulako.”

²⁷⁹ Manje senelisekile yini kutsi Jesu uyaphila futsi usemkhatsini wetfu na? Tsanini, “Amen.” [Libandla litsi, “Amen.”—Umhl.] Ngani, Loyo lowenta lesetsembiso ulapha. Manje khulekela lomuntfu lobeke tandla takho etikwakhe. Niyabona na? Bakhulekele. Niyabona na? Ungatikhulekeli wena. Bakhulekeleni, ngoba bakhulekela nine. Niyabona na? Manje, niyati kutsi Ulapha. Wenta setsembiso. Futsi uma Atokuma ngephandle lapha embikwebantfu futsi akucinisekise futsi akufakazele, kutsi kuliciniso, khona-ke kukholwe ngayo yonkhe inhlitiyo yakho.

²⁸⁰ Manje ngitonikhulekela nonkhe. Futsi nisakhulekelana, asikholwe manje ngato tonkhe tinhlitiyo tetfu.

²⁸¹ Babe wetfu loseZulwini, si, impela, tinhlitiyo tetfu tiyatfokota. Ulapha kusihlwa. Kute indzawo lehlupheke kakhulu, kute indzawo lenkhulu kakhulu, kute indzawo lekhashane kakhulu, ngaphandle kwaloko kutsi Utokuta kubantfwana baKho labakholwako. O Nkulunkulu lomkhulu waseZulwini, Utfumele Jesu Khristu esimeni saMoya loyiNgewe, lolapha manje, futsi atikhomba Yena lucobo longuye itolo, namuhla, naphakadze, nebantfwana bayakukholwa. Ngibanike Livi laKho. Ulicinisekile Livi laKho.

²⁸² Manje banengi labagulako lapha. Futsi ba—bayatfokota. Bajabulile. Banetandla tabo, lamakholwa lawa, labantfwana laba labakholwako babeke tandla tabo etikwe mnakabo logulako noma dzadze. Bayakholwa. Bakhulekela yena noma lowesifazane. Futsi, Nkulunkulu, Wenta setsembiso. Livi laKho.

²⁸³ Manje, njengenceku yaKho, ngiletsa lenkonzo kulendzawo kutsi tsine, njengemakholwa, utela kuphonsela develi insayeya, kutsi usiyenge kakhulu ngangoba ato. Sikholwa kutsi Jesu Khristu ungyue itolo, namuhla, naphakadze, futsi Uyaphila futsi ulapha natsi kusihlwa. Futsi silandzela imiyalo yaKhe, ngekubeka sandla setfu etikwalomunye nalomunye.

²⁸⁴ Sathane, bakhulule. Phuma kubo, eGameni laJesu Khristu. Akutsi letetsameli tebantfu tihambe, ngenca yenkhimatimulo yaNkulunkulu. Bakhulule, Sathane. Siyakuyala, ngeBukhona baJesu Khristu, Lophilako, iNdvodzana yaNkulunkulu levukile. Bayekele bahambe. Futsi baphume kubo, ngenca yenkhimatimulo yaNkulunkulu, eGameni laJesu Khristu.

²⁸⁵ Wonkhe umuntfu lokhona, kutsi, utiva kutsi Jesu Khristu uligcinile Livi laKhe, kutsi Ufike emkhatsini wetfu, kutsi Ulapha ngoba Wetsembisa kuba lapha! Ulapha futsi watikhomba Yena lucobo. UyiNkhosи Jesu lefanako leyahamba eGalile, futsi uyakholwa kutsi Uyaligcina lonkhe Livi laKhe.

Futsi ngoba umuntfu lotsite, likholwa, latimbandzakanya nawe, ngekubeka tandla takhe etikwenu, kutsi atimbandzakanye neLivi laNkulunkulu, kutsi manje sewuphilisiwe. Futsi umelana naSathane kutsi angachubeki nekukubamba. Kukholwa kwakho kuyakhululeka, kukholwa kutsi Nkulunkulu ulapha kugcina Livi laKhe.

²⁸⁶ Manini ngetinyawo tenu futsi nemukele kuphiliswa kwenu. Wonkhe lokukholwako, sukumani nime ngetinyawo tenu. Alibusiswe liGama leNkhosi! Phakamisani tandla tenu futsi niMdvumise, manje. Uphilisiwe eGameni laJesu Khristu.

Kulungile, Tony, wota.



JESU KHRISTU LoNGUYE ITOLO, NAMUHLA, NAPHAKADZE SSW63-0604
(Jesus Christ The Same Yesterday, Today, And Forever)

LoMlayeto ngeMnaketfu William Marrion Branham, kwekucala wetfulwa ngesiNgisi ngaLesibili kusihlwa, ngenyanga yeNhlabu 4, 1963, emhlanganweni weFull Gospel Business Men's Fellowship International eRamada Inn eTucson, eArizona, eU.S.A., utsatselwe ekucopheni kwetheyiphu lenamazibuthe futsi wakhicitwa ungakafinyetwa ngesiNgisi. Loku kuhunyushwa ngeSiSwati kwakhicitwa kwakhishwa yiVoice Of God Recordings.

SWATI

©2024 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Inotsisi yelilungelo lemtsetfo

Onkhe emalungelo agodliwe. Lencwadzi ingaprintwa ngeprinta yasekhaya yentelwe kutsi umuntfu atisebentisele yena noma kutsi iniketwe labanye, mahhala, njengelithulusi lekusabalalisa liVangeli laJesu Khristu. Lencwadzi akukamele itsengiswe, iphindze ikhicitwe tibetinengi, iposwe kuwebsayithi, igcinwe ngeluhlelo lwekutsi iphindze itfolakale, ihunyushelwe kuletinye tilwimi, noma isetjentiselwe kuticelela timali ngaphandle kwemvumo lebhaliwe lecondzile ye Voice Of God Recordings®.

Mayelana nelwati lolwenetiwe noma lwalwenye impahla lekhona, sita uchumane ne:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org